

928
ケ
12

敬業堂詩集

一二



敬業堂詩集卷四十目錄

長告集

元旦朝回 御賜酒肴果品二席中使賫至臣家

感恩恭紀

周桐野前輩貽雲碁一副

開奩皆白子也戲占二絕句

病風

瀆山酒海歌 并序

恭和 御製咏烏槍原韻

正月二十五日奉 旨停免內直仍赴翰林院供

職恭紀

二月朔日碧桃盛開

初假十四韵

盆中新種幽蘭忽吐一花

病枕喜作十二韵

元立上人淮陰張氏子幼



隨父客京師父歿權厝天津且死屬其子曰必
反吾骨故鄉時元立甫九歲貧不能自存去而
爲僧得法于平陽晝公今五十年矣辛卯秋徒
跣北來求父葬處天津瀕海沙水衝激殆不可
辨有里老張姓者依稀指其處發視墓磚在焉
桐棺無恙將奉以歸葬相見京師乞一言紀其
事爰贈以詩

獨坐聞孤雁

清明日偕馮卯君馬素村沈駟襄家言思諸孝廉
及兒建出右安門小飲祖園水亭有懷城西舊

遊

三月十五日 恩賜翰林

院講讀編檢諸臣松花江綠石硯中使宣 旨

查慎行吳廷楨廖廣謨宋至吳士玉五人向在
武英殿纂修著棟式樣佳者給與臣慎行得夔
龍大硯一方恭紀二十韻

曉出西郊

偕德尹潤木信安兒建孫

祈過摩訶菴看杏花主僧乞詩留題一絕

再疊韻一首

廣濟寺看海棠同涂燮菴

徐壇長次杜牧之街西詩韻

是日再過燮菴同年寓園看海棠兼招王樓村

荷陰清暑圖揆院長屬賦四首

送陳絨菴前輩視學山東二首

展假戲簡吳山掄薄聿修陳世南三同年

德尹招同人欲寓庭紫藤花下

陳子萬七十壽令子履中孝廉來乞詩

題汪顛三騎驢圖即送其赴醴泉縣任二首

同年王樓村嘗夢至一處梅花滿庭有一老人杖

而入以杖數樹云此十三本以付汝汝若饑時

但喫梅花便是神仙地位也覺而屬禹司賓慎

齋畫十三本梅花書屋圖壬辰四月樓村官罷

將出都以圖索句作歌贈之

因病展假院長揆公遣車邀至郊園用義山詩作

起句 院長和前韻謂余將乞長

假特寓留行之意再疊韻奉荅

自怡園藤花

曉起聞鶯聲次院長原韻

雨後觀芍藥再呈院長

鶴卯次院長原韻

聞汪紫滄同年出獄

送孫洪九之任瓊山兼簡瓊州守林碧山

平陽太守孔彛仲六十壽詩

賦得忍冬花送樓村同年南歸分韻得群字

以釋門五經約註送院長有詩見謝即次來韻奉

酬

送史做弦前輩視學粵東

二首

晚香齋畫卷紅椒上人屬

題二首

羅浮五色蝶院長屬賦

送院長揆公隨

駕避暑山莊

把犁圖爲汪荇洲前輩題二首

題從孫恒侯雲岫觀日出圖

送陳鍾庭前輩由學士督學畿輔二首

送唐次衣庶常省覲歸揚州次安溪相國原韵

湯西厓前輩自通政改授翰林掌院學士時奉使

嶺南未歸馳詩寄賀兼述鄙懷八首

送同年宋山言視學兩浙

院長自口外寄餉灤魚山巖

兒建舊任束鹿令自補部郎每生日邑之士民不

憚六百里走京師製屏幃爲壽遇余誕辰亦然

無以酬之作詩以示不敢當之意

百日假滿歸心未遂排悶成篇

偶閱雪關訓和詩輒效其體作十偈寄晚香上人

久旱得雨

雨中院長送塞山赤藤杖

至兼以詩索和次原韻

題徐壇長庶常竹趣圖

題陳希聖然藜圖

題達履中東郊尋梅圖

夏冰

余歸志已決而行在信至

院長固欲相留再呈一律以申前請

自怡園荷花四首

長律一章寄祝座主清溪

徐公九十壽

寄祝梅定九徵君八十壽

安溪相國屬和

題王石谷杏花春雨圖

安溪相國見示紀家難述舊德詩敬題長律五十

二韵

雨中過林鹿原梁園寓齋

二首

客有笑余乘驢車者賦此

會之

顧俠君庶常招飲晚翠閣

次東坡白鶴峰新居將成夜過翟秀才二首韵

院長寄馬尾蠅拂子 寄祝胡東樵八十壽清溪

大司寇屬賦二首 立秋前一日馮卯君同年

招遊樵沙道院 題四明萬開遠冰雪集後

故友貞一之子也 題亡友吳商志遺像

立秋後七日偕周桐野宮恕堂錢綱菴張日容繆

湘芷林鹿原顧俠君郭雙村家杳浦潤木兩弟

再集樵沙道院用白香山遊開元觀韵

題明興安州牧金公與游擊唐通手書後公諱之

純字健之黃州廣濟人

德尹舉第二子同學數人釀錢為湯餅之會席上

口占四首

種竹詩四首次晚香長老

韵

院長寄惠鮮鹿脯及柘綠

魚腊僕以轉餉周桐野明日枉詩見謝奉畬四

絕句亦如來詩之數

桐野又示七律一章謂前詩不必寄院長再次來

韵

題杜子綸庶常填詞圖二

首

送楊冠三同年赴任餘杭

兼訂徑山之遊二首

爲人題舉綱圖

題王石谷瀟湘雨意圖卷

同年劉大山生子名曰阿雷索詩爲贈

商丘宋家宰八十壽讌詩

同年盛東田餉青笋徑茶賦謝

題東田志行詩草後即次見投原韵

題天山坐鎮圖送胡洛思僉事備兵肅州

題陳季方詩冊

兒建乞假挈累先歸老人

行期未定悵然有作

題朱漢源佩劍圖

東田同年忽戒作詩昨日

過我賞菊醉後復破戒以詩來索和章戲次原

韵

藥酒初成

謝院長惠人漫二首

老人夜臥患足冷以錫爲

壺貯熱湯二三升許納被窩中資其餘溫可以

達且俗名湯婆子宋王晦叔有味脚婆詩黃山

谷詩中所云暖足餅即此也冬來用之甚適戲

贈以詩

送盛東田出宰興化四首

桐鄉友人至傳長孫興祖舉子及接家信乃生女

也口占解嘲二首

送德尹典試廣東二首

殘冬展假病榻消寒聊當呻吟語無倫次錄存十

六首

自題癸未以後詩葉四首

題鄒古愚望日圖小影二首

歲杪自嘆二首

周桐野前輩以隋龍藏寺

碑拓本見貽二首

敬業堂詩集卷四十目錄

終

敬業堂詩集卷四十

海寧 查慎行 悔餘

長告集

起壬辰正月
盡十二月

辛卯臘月左手病風今春漸及右臂蒙 恩停免
內直始得因病乞假前後滿百日患猶未除適兩
院長俱遠出遂因循度歲昔白香山守蘇州時年
甫五十八而退居之計已決其詩有長告雖當百
日滿故鄉元約一年回之句未幾果歸又十年而
風疾作余今年六十有三患病在前請假在後出
處之際有媿昔賢多矣

元旦朝回 御賜酒肴果品二席中使賫至臣

家感 恩恭紀

玉笋班初散瓊筵 賜北扉忽傳 中使到正值早朝

歸仙液爪黎脍 哈蜜爪東梨皆異品也 春羹雉兔肥一家同醉飽

元日拜 恩稀

周桐野前輩貽雲碁一副開奩皆白子也戲占

二絕句

朝來畫得紙為枰一咲開奩賭不成遮莫先生寓微諷
不教黑白太分明

周天三百六十一奇偶中從太極分細玩君家舊圖說
有陽可得獨無陰

病風

香山臨老愁風痺昭諫多時患臂攣自分早衰宜速退
敢云同病比前賢三災有劫誰能免五苦無塵可怕纏
不學維摩佯示疾道場還作散花天

瀆山酒海歌 并序

內西華門外西南一里許明朝御用監在焉又南數
十步為真武殿庭前老檜一株下有元時玉酒海承
以石床玉色青碧間以黑章白暈劬刻魚龍海馬出
沒波濤之狀口面約廣三尺餘隨其質為凹凸若荷
葉然形製朴古膚理溫潤中容四五石許壬辰正月
十九日偕雲間高不騫槎客往觀摩挲久之按元史
世祖紀至元二年十二月瀆山大玉海成勅置廣寒

殿輟耕錄云廣寒殿在万歲山頂中有小玉殿內設御榻左右列侍臣坐牀前架黑玉酒壺一車駕歲巡上都先宴于此燕都遊覽志云今御用監中有小亭亭內一玉缸體質頗潤中積水外以朱欄護之即廣寒殿中物也槎客屬予紀其實因參考舊聞而系以

詩

雲間高生精賞鑿嗜古搜奇確且瞻朝來導我出西華指點前朝御用監監南新剏玄都壇當門老檜青蛟蟠舊聞酒海今落此共嘆體質猶堅完瀆山巨璞初無價誰遣不脛來輦下至元巧匠雕琢成万歲山頭設高架天然位置平不頗瑣窗八面開重阿石龍吸水上霄漢

倒瀉溢為太液波波光翻動廣寒殿滿甕蒲桃映華瑱

侍臣多著質孫衣

質孫燕服見元史世祖紀

天子親臨詐馬宴電轉

星流四百年故都何物不推遷曾承沆瀣依天上流落人間亦可憐亭虛無復朱欄護頽砌旁連髹器庫天吳跋浪鬚鬣張只與空庭飽風露君不見周爨商竿近來無形製爭傳博古圖為池為海將安用咲爾幾同五石壺

恭和 御製咏鳥槍原韵

鍍金浴鐵製新傳万丈光生掌握前命中巧踰弓入彀發機突並鳥爭先毛風血雨來千里電暉雷砲徹九天一震餘威收有截坐令寰宇靖烽煙

正月二十五日奉 旨停免內直仍赴翰林院

供職恭紀

九年旣筆厠清班忝竊虛名祇汗顏瑣闥乍辭疑削籍
玉堂重到許投閒勞生分定升沈外 聖主恩深進退
間留取羽毛憐病鶴孤飛何日放教還

二月朔日碧桃盛開

無數緋桃蕊齊開仲月初人情方最賞花意已無餘

初假十四韻

涉海疑無岸收帆喜有涯初諳閒氣味已攪病情懷長
假知難遽微名料易埋密藏虛白室高挂踏青鞋一榻
春將半孤踪世孰偕自延醫入座便少客升階似鵲肩

雙塌如籤指互排屈伸寧自主運用漸多垂藥餌聊投
水針鏑等刺柴簡編從度閣典校免科差臥久兼拋杖
僧來或勸齋老蠶甘蠹葉瘦馬嗜枯蕪即事安愚分餘
生戀廢骸幾時真大咲撒手向懸崖

盆中新種幽蘭忽吐一花病枕喜作十二韻

本草繙因藥旬來偶種蘭近根微取潤培土最宜乾愛
護新芽茁爬梳舊葉完連朝風習習昨夜露溥溥笑口
欣將拆花頭側未安一尖長計寸五出辦成單靜女晨
粧淡幽人翠袖寒香來殊不意夢好却無端客有逢知
賦周弘讓山蘭賦吾方擬搽彈當門誰免忌入室雅相
驩竊逢知于綺季椒蘭芬莖所以養同心契漸難祇應賢

子弟佳氣滿門闌

時德尹潤木信安諸弟俱在都下

元立上人淮陰張氏子幼隨父客京師父歿權厝天津且死屬其子曰必反吾骨故鄉時元立甫九歲貧不能自存去而為僧得法于平陽書公今五十年矣辛卯秋徒跣北來求父葬處天津瀕海沙水衝激殆不可辨有里老張姓者依稀指其處發視墓磚在焉桐棺無恙將奉以歸葬相見京師乞一言紀其事爰贈以詩

僧臘五十八當時九歲孤淒涼銜治命辛苦望泉壚鬼守他鄉魄兒存出世軀兩消生死憾含咲赴歸途

獨坐聞孤雁

風急天高片影孤水圍初脫尚驚呼

是日行在初撤水圍

燕蔣幸

有單棲處莫入羣中更作奴

清明日偕馮卯君馬素村沈駟襄家言思諸孝廉及兒建出右安門小飲祖園水亭有懷城西舊遊

臥聞風日好暫起出郊垌歲有清明節人如聚散星烟光初上柳水氣欲生萍却憶名園路橋邊共踏青

三月十五日

恩賜翰林院講讀編檢諸臣松

花江綠石硯中使宣

旨查慎行吳廷楨廖賡

謨宋至吳士玉五人向在武英殿纂修着揀式樣佳者給與臣慎行得夔龍大硯一方恭紀二

十韻

砥石青山麓松花碧水濱天文聯析木地產富琳珉
 蘊作巖間璞來為席上珍自蒙官采擇頓發玉精神
 有用逢時出無瑕抱質純性剛偏激潤膚膩不留塵
 露氣鮮流葉波光綠漾蘋銘辭周雅古背有御書銘其辭曰以靜為用是以永年
 形製帝鴻新規矩方圓合廉隅節角勻雕龍由哲匠篋
 鳳貢儒臣賜硯有泥金漆匣憶昨隨班久曾經拜賜頻前在兩蒙
 晨詩多呈乙覽賦每達楓宸自罷文昌直仍叨竊
 祿因微勞蒙記憶末路慰沈淪優旨宣中使殊榮
 逮五人枯魚咸仰澤病樹稍知春臣分增慙慙君恩

視咲頻捧歸憐手顫增重為 絲綸

曉出西郊

小童晨出郭歸報杏花開病試經春屐隣賒過臘醅料
 風吹巷陌細雨隔樓臺未遂田園計僧寮又一來

偕德尹潤木信安兒建孫祈過摩訶菴看杏花
 王僧乞詩留題一絕

酒場詩壘付前塵不到精藍二十春今日眼昏花似霧
 僧雛誰識未歸人

再疊韻一首

弟勸兄酬不隔旬花前渾作一家春可能消得兒孫福
 奉杖將車侍老人

廣濟寺看海棠同涂燮菴徐壇長次杜牧之街
西詩韵

滿城烟柳正藏鴉好事偕尋老衲家
旛影愛飄新掃地露痕初綻半開
花畧宜步障遮濃日惜少鴟夷載
後車官似旁人苦攀折一枝歸插
帽簷斜

是日再過燮菴同年寓園看海棠兼
招王樓村笑口重開又一奇小堂
南北万花枝同時被賞寧論晚
明日來看定悔遲無雨劇憐如許
豔有風生怕不禁吹惟應火急邀
詩老趁取媽紅撲酒卮

荷陰清暑圖揆院長屬賦四首

綠水亭南万綠楊一奩明鏡貯煙
光自移玉井如船藕

高放花頭盡出牆

碧雲擎蓋午陰涼不獨花香葉亦
香想見公門清似水春糲飛近讀
書牀

六月遊人汗汁融透肌一陣好涼
風欲知魚樂看魚戲長在田田翠
影中

比似濂溪愛有加年年貪看畫中
花直從葉點青錢後剝過蓮蓬始
到家

先生每歲扈從避暑故云

送陳緘菴前輩視學山東二首

頻年慎簡出宮坊公道能令士氣
昌稽古榮歸儒者分掄才難得聖
人卿機絲合與金針度分判知從
玉尺量館閣同時皆屬目又看魁
柄指東方

水壺貯質雪飛丸清望今猶重此官絳幄風開三月後
紫躔光動五雲端蓬瀛盛事推粉社桃李新陰到杏壇
此去畿南纔七驛道旁迎謁盡儒冠

展假戲簡吳山掄薄聿修陳世南三同年

俸滿開坊及慵多請假頻雨中三月暮花外五湖春已
遠鷓鸞隊猶羈麋鹿身好官如歲酒推讓少年人

德尹招同人飲寓庭紫藤花下

此藤此地初種時詩翁酌我索我詩

藤爲桐野手植者
今日周亦在座

藤今成陰花滿架吾弟重來宅其下夜來急雨雷闐闐
拓窗起看東南天雲頭解駁日穿漏紫氣散作濛濛煙
兩龍上走尾倒懸之而鱗爪紛盤旋佛光中現寶瓔珞

絳節珠幢朝曉仙笑渠主人負花癖治具典衣誇示客
酒徒一半招不來來者留連窮日夕高烧紅燭臨前庭
燭燄浮動千娉婷忽然落藥墮杯面香入醉魂愁欲醒
十年万事經眼見况此旅寓如郵亭藤兮得氣漸張王
而我與汝俱頽齡閒坊大可養衰疾官守幸已逃拘囚
飲雖小戶且滿引莫待鳥啄花飄零

陳子萬七十壽令子履中孝廉來乞詩

曾於郎署挹清風解組歸成鶴髮翁才子聲名喧輦下

故交書札到山中荆溪花萼排家集

子萬與令兄其年
緯雲合刻家集

商洛烟霞屬寓公

時子萬移
冢中州

知是林泉能養壽自慙宦

跡尚如蓬

題汪顛三騎驢圖即送其赴醴泉縣任二首

結束翩翩西入秦也如懷縣著安仁杏園別有騎驢者

羨爾幾同鶴背人

今科進士俱留京教習不聽還卿唐時進士皆騎驢故云

逸足曾登郭隗臺屈他作吏亦仙才三峯圖上迥遙意

又看昭陵石馬來

昭陵在醴泉管內

同年王樓村嘗夢至一處梅花滿庭有一老人杖而入以杖數樹云此十三本以付汝汝若饑時但喫梅花便是神仙地位也覺而屬禹司賓慎齋畫十三本梅花書屋圖壬辰四月樓村官罷將出都以圖索句作歌贈之

鴻臚禹子特好奇聞人說夢乃畫之寒梅繞屋十三本

一一著花無醜枝問渠此屋在何許異境云自華胥移
龐眉丈人野鶴姿指樹付汝汝不辭嚼花可使食無肉
仙者得之能療飢覺來官舍氷雪冷滿牀菽菽香風吹
君家汜光湖水湄柳繁梅少地苦卑買栽開徑良不易
梅性故與高寒宜然而畫葉出神授何必遠問孤山爲
但愁書多無屋貯莫嘆樹小看花遲浮生所遇率假合
刹那劫比阿僧祇幻中生幻想非想身外有身知不知
君今罷官歸有期遽遽形開夢者誰詩成擲筆吾自哂
區區紀夢何其痴

因病展假院長揆公遣車邀至郊園用義山詩
作起句

漳濱臥疾正無憊忽枉車音荷見招藥草去扶藜杖覓
楊花來傍酒旗飄不緣別夢三春隔已憚勞薪半日遙
重到名園知有分爲憐詩癖未全消

院長和前韵謂余將乞長假特寓留行之意再
疊韵奉荅

出處心孤不自憊當歸何待故人招花隨流水雖難住
絮到粘泥已倦飄塞馬楚弓紛得失遊鷗斥鷃各逍遙
獨餘門館酬恩地

香山詩高家門館未酬恩

結作癥癘未易消

自怡園藤花

朱藤春季花入夏已狼籍名園開較晚間作一旬隔我
來若相待耀眼動魂魄舉頭千万梢梢梢上高格迴欄

三百步步步轉幽曠中休得小亭未覺方丈窄花穠四
垂鬢葉厚平展席輕如榆穿錢小串低可摘重如鯁貫
柳繁縷紛難擘尾長或計尋莖短亦盈尺高褰俄作勢
密綴欲無隙南北交絲幃東西挂簾額采香蜂經營嚙
影魚跳擲紫雲烘暖靄不受日光炙旦晚顏色殊陰晴
氣候易主人有深意召此閒吟客方當豁襟抱兼用佐
肴核擷之復湘之謂有啜花癖從公亦何幸醉飽且永
夕明歲花發時回頭莽陳迹

曉起聞鶯聲次院長原韵

煙條雨葉密難分
睨睨聲從隔岸聞
自出喬林爲求友
苦教獨客感離羣
暗穿花徑如流水
暖炙笙簧好過雲

斗酒雙甘真不厭為渠晨坐到斜曛

雨後觀芍藥再呈院長

夜來微雨曉來風多為階前芍藥叢艷色可將何物比
賞心聊與故人同遲開分落群芳後獨秀慚居万綠中
莫以將離煩折贈兩年以來園中每有花開公必遣人折送此花不稱白髭翁

鶴卵次院長原韻

四生一墮想緣深陽鳥雙棲只在陰遺種也憐同羽族
托胎誰信有仙禽雲霄已具初生質渾沌猶全未鑿心
他日長鳴聽子和勿將雀殼比淳音蘇明允詩雀殼含淳音
聞汪紫滄同年出獄

忽傳

恩赦下蕭晨病枕初疑聽果真但是旁觀多感涕誰當身被不沾巾累朝豈少文章禍 聖主終全侍從臣莫怪兩家憂喜共十年同事分相親

送孫洪九之任瓊山兼簡瓊州守林碧山

異才資格外仕路有先機洪九在武英書局校錄去冬告竣特恩叙用得邑莫辭遠着鞭如爾稀嶺雲雙鳥度海島一颿飛府主今賢者茲行得所依

平陽太守孔彞仲六十壽詩

十五年前識孔愉座中曾示武夷圖戊寅初夏余遊武夷時彞仲宰崇安家承曲阜先師學郡領陶唐古帝都宦况祗聞琴配鶴
仙山猶憶鳥為鳧懸知北海開樽處酒釀蒲桃不用沽

賦得忍冬花送樓村同年南歸分韵得群字

鴛鴦亦有偶鷺絲亦有群本草忍冬一名鴛鴦藤一名鷺絲藤豈謂閱晨

莫遽看黃白分亭亭羞獨豔兩兩含清芬願保忍冬意

嗒焉吟送君

以釋門五經約註送院長有詩見謝即次來韵

奉酬

禪宗空諸無梵夾實諸有光同日月照瑞叶龜龍負新

舊譯兩伊一豈殊三九翻譯名義云西方有新舊兩伊猶此土之篆隸久云開雖具九

九只是三三九雖殊其理常一五經大綱具五藏條目剖三十八万言

言言垂不朽大論云昆勒藏有三百二十万言佛在世時所造後人憶誦力少不能廣誦撰為三

十八万聲明先釋大論言五明者一曰聲明釋詁訓字詮目流別精理發智

母起教阿含先修行木义首明通徹牆壁解脫除枷桎

散華與貫華慧悟非愚守多羅雖布葉漚鉢必尋藕我

無廣誦力心地未離垢自從獲此書煩惱變蜆斗久知

繆緘石猥欲珍享帚狂緣稍稍歇幸免怖頭走方丈寄

一軀由旬視四肘有時或展閱默坐牢閉口先生愛我

深采善每勸醜作詩相扣擊現此霹靂手秘笈敢自藏

琅函往無咎願公調五味灌頂孰與偶眼界示空澄微

塵悉抖擻琉璃無障礙當見山河否

送史倣弦前輩視學粵東二首

去作蓬瀛海上仙文昌八座本同躔一朝掌制推三世

万里持衡在兩年史倣雲南鄉試初回故云唇氣晴標瞻斗地虹光

夜發種珠淵蒼榕錦荔成陰徧桃李春風分外妍

鳳池重望屬宮端親見丹山振羽翰昨捧紫綸千騎

出尊甫儲相公於三年前奉命祭告南海新開絳帳万人看班香宋豔才

相壇蘇海韓潮量校寬但是同朝誰不羨文章早達似

君難

晚香齋畫卷紅椒上人屬題二首

清流九派滙東湖湖上精藍傍弄珠三十年前遊似夢

黃花應笑白髭須癸亥客遊當湖始識上人于化城菴

晚香齋畫已流傳初白菴成未有緣世出世間留二老

把茅至竟讓誰先

羅浮五色蝶院長屬賦

我愛羅浮雙鳳子碧紗籠出看分明別從花底留仙種
不向林間鬪化生莊叟夢中渾未識滕王圖上總難名
祇疑園客蠶爲繭五色抽絲繡得成

送院長揆公隨駕避暑山莊

上卿侍從有仙才詔許攜家避暑來閒裏未妨披卷
過別前先約寄詩回灩魚味入三秋美塞草花多六月
開曾是往年同直地万峯回首隔蓬萊

把犁圖爲汪荇洲前輩題二首

宛轉橋通曲折溪綠陰南北岸東西玉堂不少栽花地
爲愛山村雨一犁
身占蓬池第一流却從跨鳳想騎牛山中宰相他年事

不要黃金畫絡頭

用南史陶弘景傳中事

題從孫恒侯雲岫觀日出圖

雲岫家門山去家咫尺耳平生趾未到浪走千万里客
中看畫興飛騰老矣梯空力尚能桑榆欲挽扶桑景歸
作鷹窠頂上僧

送陳鍾庭前輩由學士督學畿輔二首

芻無汲引上丹墀獨以文章結 主知奉使銜仍兼學
士持衡公不愧宗師朱衣院吏傳呼出白髮儒宮載筆
隨好是年時車馬道兩行桃柳夾旌旗

春風入座藹然披形跡無嫌自絕私花月有時成邂逅
壺觴幾處記追隨戢鱗魚厠騰蛟地塌翼鷗眠浴鳳池

未敢出郊同祖餞聊憑折柳託新詩

送唐次衣庶常省覲歸揚州次安溪相國原韵

紛紛冠蓋場勇者乃先去河橋万株柳攀折凡幾樹
九重亟儲材館選盛冷署新進半登瀛芸窗拓雲霧舊
來冰雪文詮次列州部群推著作手領袖佇知顧云胡
遽傲裝矯首赴歸路足知學問力祿養猶孺慕白華古
義存至潔如飲露天際望南帆花間指西墅人生屬有
願宵作蓬萍聚與君昨論交託契在未遇知我無若君
侵尋感末暮重來祇自悔余丁亥告假南歸次衣有送行叙久滯真再
誤厚意久豈忘聊抒贈行句

湯西厓前輩自通政改授翰林掌院學士時奉

使嶺南未歸馳詩寄賀兼述鄙懷八首

眷注 恩深出入偏重看名籍冠群仙文章舊價新增

重不礙來遲十二年先生于庚辰春由編修改諫垣

久推公望稔公才合到蓬山頂上來品秩不殊銜特換

北扉班歷大銀臺

同時領教得名臣程李欣傳拜 命新到此始知師席

貴錦袍分占兩家春明弘治中程篁墩與李西涯同時領教西涯有詩云詞林盛事久相

仍師席逢君喜不勝今先生與少司空揆公奉旨亦同教習庶吉士故云

望中一髮海天青暫借文星作使星莫被江山久留滯

無邊風月在頭廳唐翰林承旨所居第一閣亦名頭廳在學士上今之掌院即承旨職也

詞林故事聞前輩誥勅元須巨手裁便合還 朝稱閣

老文淵內署待公開舊傳文淵閣為翰林內署詔冊制誥皆屬焉凡宣召文移止稱翰林

院初不以內閣名每日與閣臣會食輪學士一人專掌誥勅多挨次入閣者故例稱閣老今蘇州有閣老坊乃吳鮑庵為學士時建

石渠天祿校書頻仍歲員多比積薪我是史官頭雪白

末班猶領百餘人編檢俸深無過余者

敢擬微之並樂天才名官職兩殊懸只除一事差相似

恰比先生老七年白香山詩自注云予老微之七年今余與先生年齒相去亦爾故得借用

病中未奉休官檄枕上先成寄遠詩計日乞歸應有分

向來心事荷深知

送同年宋山言視學兩浙

送同年宋山言視學兩浙

送同年宋山言視學兩浙

與君隣墻居晤言實疎曠隔墻見高樹雙鵲巢其上連
朝傳好音奉使開絳帳余方移疾臥君過問無恙握手
起踟躕慰懷釋惆悵吾鄉十一郡山海饒氣象自昔不
乏才名賢出輩行讀書想前喆指授不流浪長老尊所
聞後生知所嚮家家承桀夔一一資蘊釀自從婺學衰
科舉變時尚姚江矯斯弊絕學揭孤倡傳習到南雷淵
源大流暢經經緯以史文筆兩浩蕩秀水朱竹垞及慈溪
姜西溟頡頏庶相伉爾來復誰繼耆老日凋喪菑畲任榛
蕪多士將安仰君生公相家儒雅世宗匠商聲振河岳
金石比清亮人稱詩滿囊自喜書歷摶此行執文枋獨
力狂瀾障榘榘豫章材厥初視乎養植根在績學條蔓

芟冗長風先絕奔趨名亦戒標榜轉移良易事勢捷登
高唱徒從制藝論於衆非所望吾今老且廢記誦月就
忘尚思炳燭光未肯頽然放平生倅直性語出常近藹
歸去作州民菰蘆倘相訪

院長自口外寄餉灤魚山蕨

山澤珍難二者兼灤魚肥美蕨芽甜銀絲斫鱸冰調水
錦帶宜羹雪點鹽私爲飽餐慙過分頻叨遠餉恐傷廉
年來口腹真相累此疾從今也要砭

兒建舊任束鹿令自補部郎每生日邑之士民
不憚六百里走京師製屏幃爲壽遇余誕辰亦
然無以酬之作詩以示不敢當之意

古有歌來莫人今屬去思不聞循吏傳兼補白華詩宦
蹟清殊愧民風厚可知年年四五月重甕到京師

百日假滿歸心未遂排悶成篇

乞歸無路且遲遲長告俄踰百日期已是膏盲成痼疾
非關藥石少良醫飛鳥將子於誰止兒建先以病告假行有日矣老

馬為駒只自嗤轉覺君恩難報稱俸錢三万又虛糜

偶閱雪關訓和詩輒效其體作十偈寄晚香上人

人

耶舍在孕七日和修處胎六年那論後先遲速各人自
有生緣

造物為爐為炭衆生自灼自煎本來無垢無淨跳出湯

泉冷泉

馬鳴廣造論議阿難修集多羅一字不圖遮眼試教燒

却如何

五百龍宮鶴衆他生盡是門徒切忌當頭着棒且須開

手還珠

業惑即迷即悟慧根何淺何深倚杖雖傷佛面投鍼便

契師心

塔上鈴鳴何語墻頭播動誰家禁得毘藍風力除非一

角袈裟

一家眷屬何有木魅水怪山魃雖則門風高峻就中容

得波旬

法要不關衣鉢禪宗易雜龍蛇東方入世避世康樂在
家出家

童子燒香掃地厨人篩米搬柴此段作何消受老夫念
佛持齋

八万四千偈子猛逢毒手多刪截斷口頭語句請師另
逗機關

久旱得雨

聽說今年旱南連竟豫愁遺蝻仍出地宿麥已無秋得
雨寧嫌晚如膏幸徧流黍苗多望澤莫但洒皇州

雨中院長送塞山赤藤杖至兼以詩索和次原

韻

孔光靈壽儼非倫冒雨猶煩送杖人倚賴扶持防滑路
料量筋力好抽身鳩知祝咽先濡味龍欲騰梭早濯鱗
不向街頭輕曳出撥開雲霧即狂塵

題徐壇長庶常竹趣圖

泉聲絕澗秋咽霜信空山早寒何物不當搖落此君獨
占檀欒畫中千个万个賦裏三竿兩竿留取數間茅屋
從教日報平安

題陳希聖然藜圖

閒拋万卷在巾箱多爲官書校勘忙眼大如箕君莫怪
已將藜火比螢光

題達履中東郊尋梅圖

黃埃高壓城頭山老夫畏暑方掩關何來一幅好圖畫
彷彿置我羅浮間圖中之人貌冰雪格與苔枝兩清絕
從知托興在高寒不怕侵肌有炎熱因君棖觸動歸心
欲和孤山處士吟明年君放西湖棹但向梅花多處尋

夏水

一派方諸水來從石上流物無堅不化性有重還浮耐
冷誰能踏乘炎勢易酬夏蟲渾可語吾欲詰莊周

余歸志已決而行在信至院長固欲相留再呈
一律以申前請

世味酸鹹別歸心老病交寧忘魚在藻其奈鶴思巢古
有成人美吾非解客嘲願公全末路道在遯三爻

自怡園荷花四首

一片頗黎上下空芙蓉城現水精宮已離大地炎埃外
尚在諸天色相中未免情多絲宛轉爲誰心苦竅玲瓏
雲烘日炙如相試賴是清涼不待風

雕闌北面小亭旁久坐真成透骨香翠羽拂奩開皎鏡
綠衣扶扇侍紅粧繁華肯鬪春三月澹蕩偏宜水一方
馬跡車輪尋不到別依淨域作花王

菰蒲響雨午瀟瀟盡洗胭脂取寂寥一鷺偶依踈影立
雙魚忽破靜機跳輕撓劃浪紅翻岸高柳移陰碧過橋
宛在中央情脉脉微波咫尺去人遙

菱角雞頭漸滿池亭亭獨攬出塵姿難留雨露珠頻瀉

自拔泥汙性不緇老衲山中移漏處佳人世外改粧時
白頭相對歸心切欲捲江湖入小詩

長律一章寄祝座主清溪徐公九十壽

吳興自昔多耆舊人瑞今歸九十翁古殿靈光尊海內
歲星朗耀在江東龍門傳裏張丞相淇澳詩中衛武公
落落乾坤誰行輩明明朝野屬宗工韓歐著作奇而正
顏謝篇章麗且雄細入管城抽虎僕健踰弩矢射牛螭
文壇地望高于位談吐光芒亘若虹白雪調孤卑郢曲
朱絲絃直叶廂桐主張聲氣能延攬領袖儒紳待發蒙
李泌藏書借諸葛蔡邕秘本得王充頌琴拂拭知黃鵠
老研摩挲辨帝鴻却對友朋心轉小愛聽絲竹耳逾聰

人稱恭謹成家法客許周旋合禮衷什襲有囊多錦製
留題無壁不紗籠徧栽桃杏開芳徑新茁芝蘭壓舊叢
雅量風清兼月白閒情澗碧與山紅陸龜蒙里移茶竈
張志和家續釣筒峯倚百寮如畫幃泉疏半月是清漚
居鄰崑閬差相亞道在神仙必可逢憶昨歲當京兆試
吾師力具大臣風如網獨挈收羅廣比鏡虛懸藻鑑融
拔茹心傾非黨援掄才典鉅本公忠肯教誨燄淆清濁
特荷 君恩見始終存問屢承 中旨渥晉階還校在
朝隆壺漿出境迎千里几杖同時授 兩宮已勅天廚
供飲膳復頒 宸翰示褒崇衣冠盛事推華皓扶掖餘
榮逮僕僮八洞雲霞雙蠟屐五湖烟月片青篷種魚蘋

未看群戲養鶴松梢待上翀自信結胎從混沌寧煩訪
道到崆峒千莖雪變丹爐火百煉鋼銷赤堇銅下士口
傳非要訣至人踵息有深功葢珠乍轉時三扣瓊液閒
拋偶一中黃髮高堂老宗伯黑頭子舍大司空抱來膝
上皆文度呼出尊前悉任童成器固知由哲匠學箕旋
喜作良弓虞庠又見孫曾入洛社稀聞橋梓同兩寺高僧
招遠永五君新咏削濤戎阮宗大小分南北裴眷東西合
耄种雨過籬根采黃菊霜餘渡口賞丹楓小春晴暖梅
先報十月温和水未凍平叶屏展彩蟾金的鑠杯浮綠蟻
玉玲瓏遠從翠鳥尋琅菜近向玄都覓綺葱賤子受知
非一日微官托跡類孤蓬執經曾附三千士箕曆俄周

十二蟲常願籃輿隨靖節敢云藥物備行冲升沉分已
安岐路進退心惟撫薄躬寸簡迢遙馳北闕辦香親切
奉南豐秋來準擬求長假歸去猶思效祝蒿屈指稱觴
期可剋門墻雖峻往來通

寄祝梅定九徵君八十壽安溪相國屬和

數參河洛在先天絕學今猶見一賢訪道早承君相
問著書老望子孫傳管中窺豹知千古杖頂安鳩又十
年翁本西京仙尉後世家仍合號梅仙

題王石谷杏花春雨圖

溪光汎汎山濛濛杏花十里五里紅此時江南新雨足
農事未起春方中我愧不如把釣翁小舟閒泊菖蒲叢

又愧不如卅角童騎牛踏徧村西東無端乃被一官縛
坐令畫圖之景到眼成虛空還渠自向高堂挂報我歸
期行已屆但吟初白老翁詩何必耕烟散人畫

安溪相國見示紀家難述舊德詩敬題長律五

十二韻

相國勲猷盛旂常日月邊廟堂調鼎鼎寰宇靖氛烟却
自承平際追思開創年安溪城僻左瘴海地連綿劇盜
營三窟官軍敗兩甄縣疆騷永德郡界躡漳泉挺險猿
猱捷潛蹤蜂躉懸最難防出沒多是困迤邐村落胥波
蕩深山亦蔓延公家時避匿叔姪被拘孿弱肉疇能保
強宗孰與聯間關歸仲父急難見英賢虎口危將探錫

原痛莫前試憑三寸舌行挾一空券本擬辭相奪終知
怙不悛脫身思變計除惡要兵權豈有田橫客俄揚祖
逃鞭一呼童僕應兩志弟昆堅買劍招莊戶椎牛出牧
田誓詞情欸欸義憤涕漣漣首以身衝賊誠堪十當千
拔弧惟恐後集矢共爭先是夜昏迷路其時霧塞天彼
愚驕恃衆我怒勇躋顛岩谷聲搖動風雲氣接連夢魂
克膽裂頭尾亂屍填鼠穴還深鬪鳥巢又繼燃曳柴妻
子棄委壑糗糧捐牙藥俱殲矣根株務拔焉向來投死
地何敢冀生還失喜經年陷仍看十口全親朋篩酒會
官長插花筵赴敵雖倉卒成功詎偶然衣冠森介冑臂
指儼戈鋌遂使鴟張勢翻爲撲滅緣節竒因險著事往

賴人傳屬者當藩逆先生適錦旋料其情必歟聊復分
相牽懇切迎師表辛勤伐叛箋蠟丸宵入奏露布曉遐
宣自爾蒙 恩重因之嚮用專畫轅開八座黃閣入三
遷忠孝培逾厚流風久慮湮伏陳家世事仰荷 聖衷
憐 賜額旌閭里分榮賁豆遠鄉評公可采國史實宜
編表表推名杰煌煌紀大篇時無門比峻家有筆如椽
閱歷干戈畔分明指顧前境真由目擊痛定尚心悄示
後言何苦光前道不愆會須鐫琬琰餘澤永栢棧

雨中過林鹿原梁園寓齋三首

西家井底窺天小東家樓前瞰地寬一雙病眼無處豁
且冒雨出尋蘇端

人言進士不得進用太白語自詭書家嬾侍書呼朋日飲坐
無事豈謂有愁煩破除

梁園水通虎坊橋及見老柳垂千條三十年來太搖落
憑欄雨急風蕭蕭

客有笑余乘驢車者賦此畱之

過酒逢花便出遊蹄間一尺駕輕軛泥塗安穩偕僮僕
灰洞馳驅讓馬牛得免徒行猶有愧更爭先路欲何求
冗官只笑騎驢客老向天衢閱八騶

顧俠君庶常招飲晚翠閣次東坡白鶴峯新居
將成夜過程秀才二首韻

怪底東吳顧文學才名今始透春關偶移種竹栽花地

如廉泉讓水間更上一層宜有閣特開西面爲看山
滄州酒釀南烹潔每到君家醉飽還

萬卷書多插架仍肯教輕棄短檠燈簾前涼以三更雨
屋裏清于六月冰朝爽不名名晚翠閒官何似似高僧
依稀宣北坊西角鴻爪留泥我亦曾

癸酉夏秋間
余寓居此巷

院長寄馬尾蠅拂子

千條宛轉綰初成便有風從繞指生柄短不勞犀作骨
尾長仍借塵爲名禪門付法今尤濫人世清談久見輕
欲效驅除苦無力青蠅當暑正營營

寄祝胡東樵八十壽清溪大司寇屬賦二首

吳羗山色鬱然青中有元家野史亭人指所居爲福地

天留此老應文星河汾業盛傳三世夾深功高在六經
千尺喬松多美蔭重看蘭玉繞階庭

尚書北面舊稱師

司寇公少受業于先生

碩果西吳更有誰著述

久歸三館貯才名曾受

九重知烟波放艇懷清雪風

雨連牀記莫釐

庚午秋冬先生在洞庭
東山書局余獲追隨

見說精神猶健

在杖朝不異杖鄉時

立秋前一日馮卯君同年招遊樵沙道院

抱痾儵半載閒居治幽憂故人憐我衰招赴城南遊樵
沙古道觀風氣清瀏瀏東南烟靄交野色翠若浮短墻
俯而瞰下有瓜芋疇入門樹干霄檜栢榆槐楸涼蟬一
聲嘒天地颯以秋微颯自北來大火方西流談諧雜坐

臥几席兼衾稠豆籩既靜嘉旨酒亦思柔二馮乃舊好
卯君施如唐萬斯洵良儔兒孫胥在眼弟姪互勸酬置我
于其間頽然一白頭主人誼良厚欲起每被留試問勢
利交有此摯性不浮雲翳空虛聚散豈自由且為六時
樂用豁窮年愁

題四明萬開遠冰雪集後故友貞一之子也

孟郊歿後千餘載苦語何人更別裁風雅道衰無至性
海山地大得奇才翻瀾涕淚隨聲出徹骨冰霜煉句來
竊喜故人還有子一編浮白為渠開

題亡友吳商志遺像

每過南湖畔傷心是勺園吾猶識前輩君克肖家尊余少

時待先大人於禾郡及見尊甫培園先生彷彿生前影淒涼
回首耆舊更誰存

立秋後七日偕周桐野宮恕堂錢綱菴張日容
繆湘芷林鹿原顧俠君郭雙村家查浦潤木兩
弟再集樵沙道院用白香山遊開元觀韻

未忍別朋友乃如戀京師循環互主賓荏苒淹歲時自
我為此會四三年於茲中間小聚散比復相追隨心閒
耳目清地曠花卉滋手攜白藤杖笑倚青松枝林風有
餘涼襟袂快一披蓐收鞭白日西走不稍遲顧惟衰病
身乞歸行有期但恐出處跡從今遂參差兄弟幸無遠
是日潤木治具羣公莫告疲聊希達士達仰托知音知

題明興安州牧金公與游擊唐通手書後公諱之純字健之黃州廣濟人

公守興安日明當甲戌年廟堂全局壞山谷一城堅餉匱雖難給民貧實可憐飛書留片紙辛苦想籌邊

德尹舉第二子同學數人釀錢為湯餅之會席未及得上口占四首

湯餅筵前賀客俱爭誇老蚌出雙珠大兒已識之無字

箇是徐卿第二雛長名佛抱今年已上學

又見添丁喜可知衝筵不怕眾賓嗤一錢舊是看囊物半月前頭助洗兒

兒生亦是壬辰歲恰後而翁六十年便作小同呼也得

可憐花甲一周天

吾年十九初生子子又生孫已就婚余長孫興祖三年前已就婚雲夢

慙愧比渠多兩世滿頭白髮望曾孫

種竹詩四首次晚香長老韻

竹本淇涓材移根到燕土有如傳衣人微命絲一縷傳衣

之人命如懸絲五祖屬付六祖語買栽當六月正值濯枝雨生意盎然

回定僧為起舞

瘦鞭走空庭無筍可汝口齋厨貧少味待得明年否未訂歲寒交聊充消夏友青冥長在望苦節須自守少陵苦竹

詩青冥亦自守袖銜種竹詩戴笠晨過我秋涼約往看我意大肯可詩

好書復佳展開風滿坐因之悟畫理如對鐵鈎鎖

痴人戴凱之作譜搜方志欲收山谷產盡作樊籬寄寓

目何用多三竿兩竿翠竹如領此語為我發清吹

院長寄惠鮮鹿脯及柘綠魚腊僕以轉餉周桐

野明日枉詩見謝奉會四絕句亦如來詩之數

柳貫紅腮火燎毛 賜腥曾記潤脂膏而今老病如枯

腊地主恩同菜把叨

即鹿何須更入林得魚原不費猷針殷勤為謝南來使

已少臨淵見獵心 以上二首 寄院長

水陸郇厨厭飫頻腹腴尾血取鮮新勿嫌薄饋分乾噬

也當貧家作主人

不負漁師與獵師從旁指動為觀願朝來齒頰回餘味

博得先生四首詩 以上二首奉 荅桐野先生

桐野又示七律一章謂前詩不必寄院長再次

來韵

懷珠戴玉互成文 本草鹿戴玉而角 斑魚懷珠而鱗紫 直作詩題遠見分

網出千絲辭密藻射來五色想棚雲雪斑味美秋方足

柘綠名佳古未聞義合及賓吾敢靳要傳新句滌辛葷

題杜子綸庶常填詞圖二首

點拍吹簫色色工黎雲一研雨聲中風流爾許真堪妬

自琢新詞教小紅

早是人歌緩緩歸誰搓柳汁染郎衣杏花鵝汗桃花雨

懊恼樊川杜紫微

送楊冠三同年赴任餘杭兼訂徑山之遊二首

秋野雞豚社春山茶笋鄉居人力農圃賢宰好文章衙
鼓聲前臥爐烟蕪後香城偏迎送少幽事滿琴堂

暫作修門別旋期故里逢君方行綰綬我欲去攜筇西
上通雙徑南來控獨松洞天兼福地一一屬花封

道書大滌

山爲洞天之一天柱山爲福地之一皆在縣治內

爲人題舉綱圖

翠柳陰中水不波長魚如劍亦如梭
篋來大有幸不幸入網無多出網多

題王石谷瀟湘雨意圖卷

平生愛看王老畫筆蹤幻化無端倪
畫石畫水兼畫竹世罕其匹古與齊
不師文與可不學吳仲圭墨君粉本
何處得乃在洞庭南北湘東西似聞瀟湘間陰多晴少
雲淒淒湘君去後湘竹怨留取
千古斑斑啼鷓鴣昏昏喚作雨山茵
竹雞一名山茵子滑滑呼成泥九疑劉天不可梯
居人寥落行人迷我昔南遊身未到側聞人說往往猶
含悽今觀所畫殊不爾洒落別自開町畦山舒水緩橋
平堤步有舟航林有蹊籬門茅屋幾家住翠色不受纖
塵翳

平叶

嵐光深淺葉濃淡地勢起伏叢高低展之尋丈

卷盈握疑有煙雨隨提攜乃知善畫取大意信手故自
忘筌蹄適逢好事者持卷乞我題我詩不入竹枝調恍

然如坐篔簹谷口蒼筤谿

同年劉大山生子名曰阿雷索詩爲贈

種樹期開花花開實斯榮實以况男子花以比女嬰憐
君五十餘形影猶单悻前歲甫生女去冬兒復生兒當
未生時厥兆先通靈筮易卦遇震生以雷爲名吾觀易
示象震來遠邇驚一索而得男衆口傳轟轟配天爲大
壯剛健舍利貞配坤則爲豫嗶嗶奮陽聲配坎則爲解
甲拆敷萃英配巽則爲恒人道以久成配艮爲小過應
時與偕行配離則爲豐日中照乃明配兌爲歸妹長少
義交并于益取日進于隨取元亨于頤節飲食于屯驗
滿盈无妄貴无災噬嗑貴慎刑大哉復之義剝極陽始

萌凡茲諸吉祥皆於易理呈皇天不汝薄釋抱來寧馨
特從憂患中用此慰汝情汝可不知足一官何重輕嫁
女雖乏財教兒頗有經祝兒日千里躡步陵公卿他年
聽雛鳳或比老鳳清

商丘宋冢宰八十壽讌詩

世澤扶陽厚重傳嶽降神中原留碩果四海一完人開
府專旄節還 朝領摺紳遺榮辭魏闕 予告就商賓
風月香山社鶯花落水濱懸車時未晚 賜馬齒長新
坐握高談塵行扶大雅輪耆英來汝許子姝列荀陳詩
好人難和心虛士樂親位兼名並重時與物皆春養鶴
千年頂瞻松百丈身飛觴同賀歲遥祝釣璜辰

同年盛東田餉青筍徑茶賦謝

楊侯三 謂冠出宰餘杭縣與訂歸期又涉秋好友忽攜鄉
味到老夫如作徑山遊青尖色嫩初開箬綠片香清欲
泛甌一首新詩消得否齋厨無物可相酬

題東田志行詩草後即次見投原韵

同年來詩人莫逆笑相視唱訓日不隔冒雨煩僮使虛
懷荷見推倒篋啟行笥百篇快披閱口諷手弗置爽氣
颯然生高冥偕抗志君才洵敏妙蚤合清殿侍五十甫
成名一官迨需次蹉跎感顏狀磊落示標致往往激壯
心時時吐沈思古音非近賞至味有同嗜六義世誰陳
於君識風刺簿書何足擾野馬過浮吹顧惟醞釀深根

抵皆有自試以易理推十年貞乃字

東田於癸未成進士今年矣

題天山坐鎮圖送胡洛思僉事備兵肅州

按圖舊識西陲遠入畫今看使節聞雪點旌旗秋出塞
風傳鼓角夜臨關地連張掖燉煌界人在輕裘緩帶間
一片孤城歸坐鎮不煩三箭定天山

題陳季方詩冊

詩風日以盛詩義日以乖忽於波靡中豁達耳目開之
子非絕俗而難與俗諧所關學不學豈繫材不材春華
人亦賞秋實人亦采華實所以然根株故有在遙遙古
今宙相望恒相待方謂老眼空快心今獲乃五十有九
章章章非苟作犁然見此興諷諭于焉託此中有餘味

深淺視斟酌子既啜其醇吾言特糟粕

兒建乞假挈累先歸老人行期未定悵然有作
委蛻兒孫去惟留病伴吾未能辭逆旅翻與念長途短
夢江湖濶餘生出處孤殷勤木上座歲晚好相扶

題朱漢源佩劍圖

平生蚤識朱公子要腹便便貯經史無端結束佩吳鉤
繪作戎裝稱壯士高步名場三十秋看人談笑取封侯
知君與世無恩怨賣劍何妨去買牛

東田同年忽戒作詩昨日過我賞菊醉後復破
戒以詩來索和章戲次原韻

聞君戒作詩枯寂徒自窘我思破其戒堅壁恐未允試

以酒誘之徐徐俟激軫半酣不自禁大白果連引妙語
發天機瀾翻吐難忍明朝傳急足一咲啟吾胸黃花開
正繁虛坐前後盡落英尚可賦有味出咀吮

藥酒初成

老人冬來如蟄蟲坯戶况值蜚廉風藥爐新煮藥酒熟
氣觸鼻觀香先通披衣起坐暖寒冽卯飲一呷回春融
氣衰形耗百病作豈有草木能相攻此身略似受霜葉
藉爾暫發衰顏紅

謝院長惠人漫二首

一兩黃參直五千囊空欲致坐無錢朝來忽荷盈觔賜
補貼貧官俸兩年

祖陵地脈禁私創都市居奇價日高翻惜 聖朝多棄
物三稜五葉委蓬蒿

四大相纏豈獨風難憑神草證神功七年病要三年艾
還在醫王藥籠中

老人夜臥患足冷以錫爲壺貯熱湯二三升許
納被窩中資其餘溫可以達旦俗名湯婆子宋
王晦叔有咏脚婆詩黃山谷詩中所云暖足餅
即此也冬來用之甚適戲贈以詩

貧家奉身薄外物罕所需獨宿踰十年布衾溫有餘匡
床劣容足伸縮頗自如冬來忽畏寒始嘆氣血枯雖無
重膈疾未免愁攣拘何法能療之范錫成圍模形如大

口盎又若平底孟口大有受理底平無覆虞沸湯貯三
升脫襪加雙趺居然似踵息陽氣回徐徐豈徒活筋骸

漸爾柔肌膚宵臥可達曉晨眠容及晡我欲老是鄉是

鄉勝華胥既非燕玉比杜詩暖老須燕玉且與渥朴殊東坡詩晴窗暖

足來醉醒惟獨覺冷暖寧關渠婆兮古所名聊作爾汝

呼無情亦無想義出楞嚴經老婦得老夫

送盛東田出宰興化四首

名士誰如盛孝章可人風味是清狂故應天與佳山水

生長山鄉宦水鄉盛爲杭之臨安人

范老留題剩古苔官情多委簿書堆濯纓亭外馴鷗地

又得詩人管領來濯纓亭范文正公宰興化時所建公又有南溪馴鷗詩

千里攜家喜可知免教鈞棧走嶮崎他時檢點還朝集

惜少騎驢入蜀詩

東田初掣授四川富順縣後改調興化

二三千頃菰蒲綠六十四陂菡萏紅

縣有入湖六十四蕩五六月間荷花

最盛花裏尋君知不遠過淮只使半颿風

桐鄉友人至傳長孫興祖舉子及接家信乃生

女也口占解嘲二首

誰把維虺比夢熊傳訛幾與弄麀同笑將鏡鑷投諸地
等被人呼作太翁

弱女非男却勝無苦催吾景赴桑榆可憐孫又為人父
二十年前膝上雛

送德尹典試廣東二首

平生三度嶺南遊此去星軺速置郵榮路人皆艷科目

官資爾已歷時流

詞垣升轉近皆論俸惟試差開列尚依舊制論資德尹名在第一不

愁寶劍光華掩須信芳蘭氣味幽還恐高鴻在寥廓張
羅藪澤詎勝收

七千里外動征輪寒薄重裘雪洗塵疎柳愛飄江上笛

早梅催發驛前春名場後進雖多士詩社前遊頓少人

時藥亭元考翁山俱下世

珍重老兄留眼望蘇家門下要張陳

文潛無已

皆子由門下士也

殘冬展假病榻消寒聊當呻吟語無倫次錄存

十六首

臥看星回晷景移流光冉冉與衰期人言宦海藏身易

自笑生涯見事遲夜似小年寒漸信病非一日老方知
惟餘蕁菜思歸興蚤在秋風未起時

憶昨公車待詔來微名忽忝廁鄒枚 主恩不以優俳

畜士氣原於教養培身作紅雲長傍日心如白雪漸成

灰依稀一覺遊仙夢初自蓬山絕頂回

茫茫大地託根孤只道煙霄是坦塗短袖曾陪如意舞

長眉難畫入時圖移燈見蠅寧防毒誤筆成蠅肯被汗

竊喜退飛猶有路的應決計莫躊躕

雨露榮枯共一天塵沙聚散幾同年車摧却怪蓬猶轉

玉碎何圖瓦幸全螳穴冰封殘雪後鴈程風緊夕陽前

故人珍重留行意

謂揆湯兩院長

回首觚稜自惘然

盡遣兒孫歸故里尚留弟妹伴他鄉囊空預借三年俸

祿入粗供四口糧

隨身止三僕近領俸米六石足支半年矣

舊積詩逋呵凍

了近添酒債典衣償蕭然此外無餘欠領取南窗枕味

長

一榻中安四面虛放朝渾似放叅餘篋中棄扇蟲緣網

案上停燈鼠避書過隙光陰隨夢去就衰筋骨向陽舒

重簾可有纖埃到敝帚殘筭罷掃除

膈膊聲中好送寒偶然為客設碁盤後來或者居人上

先處無如占地寬黑白當前饒勝美高低隨分有爭端

老夫兀兀支頤坐看似分明下手難

科詔加 恩典不常征軫就道輩相望抱經佚老頭多

白拾芥群兒口半黃慘澹風雲憐入殼冬烘頭腦怕當

場退身引疾猶多愧我昔曾荒陸氏莊予自丙戌後試差俱辭免

海內連年喪老成南傷秀水竹垞先生歿于巳丑秋北新城阮亭先生

千去年讀書自要師前輩知己誰能託後生此段人情

看爛熟向來士習例相輕笑他江左衣冠族誓墓區區

為角聲

地降天升氣不交羽禽何物尚膠膠霜濃四野鴉爭粒

葉禿千林鵲露巢各有經營寧得已未知辛苦定誰教

息黥補劓勞生事蓋頂終須一把茅

經旬坐穩一蒲團纔閱朝寒又晚寒蘊火梅欣先臘放

避霜菊耐涉冬看散花菴裏新居士視草臺中舊史官

勿着雨般分別相大千世界本來寬

不畏群嗤不受憐孤行一意久彌堅敢誇願大難成佛

肯舐丹餘蚤得仙方朔文章多詭俗放翁家世少高年

劍南詩家世無高年我今六十翁色經指訣全拋却人壽終非草木延

宜忌拘牽十二三靈苗毒草比粗諳性存薑桂何妨辣

味到苓連不取甘好友勸嘗真苦口庸醫隔膜漫多談

古方難適今時用此理如禪在細叅

却病竒方乃避囂遠坊兩板閉蕭條室無歌妓何煩遣

鄰有鄉僧不待招謂借山石鼎濤生茶正熟銅爐灰陷火

潛消雞鳴漏盡人誰覺又聽門前過早朝

叢書三館校讐忙訝許閒情付墨莊樗本不材良匠棄

屠非絕技善刀藏冬菹剩飽園官菜歲賜刪除博士羊
轉益從前素餐愧大庖珍膳日分嘗

童時了了記觀河六十二年忽已過眼暗耳聾知老否
葛涼裘暖奈身何一帆去國談何易万卷無家累亦多
愛惜精神圖省事明年兼擬謝詩魔

自題癸未以後詩藁四首

七年供奉入乾清三載編摩在武英兩臂病風雙眼暗
枉將實事換虛名

論卷排成手自刪多慙小草落人間迷藏賴有南山霧
莫便輕窺豹一斑

橐筆曾經侍 兩宮可憐無過亦無功未應奢望儒林

傳或脫名於黨部中

拙速工遲任客誇等閒吟徧上林花平生怕拾楊劉唾
甘讓西崑號作家

題鄒古愚望日圖小影二首

鄒生真與古爲徒人謂生狂自號愚不戀桑榆收晚景
却回巖電向東隅

君如要看博桑日試上鷹窠万仞巔只合俯身臨碧海
何須仰面望青天

吾鄉鷹窠頂東臨大海
寅卯之交於水底見日

歲杪自嘆二首

短景侵尋白髮前歸心歸夢日相牽人間雀鼠工嗤點
伴食官倉又一年

敬業堂詩集卷四十一
天生物性故難齊健水東流弱水西不信羶羊能挂角
如今只有觸藩羝

周桐野前輩以隋龍藏寺碑拓本見貽二首

一千二百僧祇劫龍藏今無片瓦遺不有歐陽能集古
空勞佛力護殘碑

翠墨椎來體尚全書家名姓惜無傳唐賢風骨依稀似
得法歐虞褚薛前

敬業堂詩集卷四十

敬業堂詩集卷四十一目錄

待放集

韓幹放馬圖次東坡題李伯時所藏韓幹馬七言

古詩韵

今年擬不作詩復為友人

牽率破戒口占自解

院長湯西厓前輩出示與副相揆公贈荅詩索余

次和六首

題徐去矜侍御日南種菜

圖

癸巳仲春上丁 文廟分

獻紀事四首

二月二十日雷雨之後忽

復嚴寒枕上口占

後二日雪

恭祝

皇上萬壽詩四首

題石門勞釣天日邊鼓篋圖二首

山野老人遠來祝 萬壽者以千計目覩盛事紀
之以詩 雨後過自怡園看海棠同

院長作時余復請假

四月朔大雪

送同年海天植前輩視學

雲南

重過封氏園飲矮松下偕

綢菴湘芷俠君潤木作

再賦古松疊前韵

從刺藥園步至陶然亭

壽山田石硯屏歌副相揆公屬和

循例請封典有作

自怡園曉起即事呈副相

獨坐紫藤花下

食新笋

放船至因曠洲

乞長假留別院長揆公二

首

雨中發自怡園再呈院長

附揆院
長作

車中遇佟陶菴同年

吳寶崖以西苑龍棚詞百首新刻見貽兼索題句

四首

端陽前二日薄勺庭招諸

同年集王園芍藥花下

酬別陶菴同年六首

題宋蘭暉潯陽送客圖

題程蒿亭持竿圖小照

晚香長老六十乞詩

陰雨連綿頗似江南黃梅

天氣

送蔣樹存出宰餘慶

乞歸侯

旨未得成行寓庭雜蒔草花用以遣日

吟成四首

次日社集張匠門齋同人

皆和余種花詩再疊前韵四首

題王石谷爲張超然畫旌節圖

去夏手植盆榴二本今年一枯一榮有感而作

院長貽嶺南椰子 林鹿原餉武夸茶

木本金銀花十四韵 庭西牽牛子新苗競發喜

成十韵

和張日容嘲薜荔二十韵

晚香長老贈桃枝竹杖

同人集棗東書屋分賦二首

汪陞交郡丞屬題負米讀書圖時將赴任潮州即

以贈別

題故汶州太守潘君畫像

送同年劉大山應 召赴行在二首

畫義 題王石谷山水四首

留別潤木即次弟送行原韵四首

留別詩社諸同人次張匠門見送原韵

匠門以瓶蓮十二韵索和次答

題吳寶崖在山讀書圖即送其出宰在平

諸君爲余作桃枝竹杖歌余亦自賦一首

苦熱 題莊書田笠屐探梅圖

仇山村詩翰一卷乙丑秋於竹垞寓齋見之偕故

友魏禹平題名其後未幾此卷歸吾鄉高文恪

公又二十九年癸巳公之孫礪山攜至京師屬

余題句存歿之感愴然于中聊附數言以志歲月

鶴圖二首

題鄭寒村為魏仿韓畫樓

觀蜘蛛布網

題泰州宮氏春雨草堂圖

題俠君噉荔第二圖

洗象詞五首和顧俠君

咏周尊彝十六韻

藏經匣歌 并序

之寓樓即席留別四首

自怡園二十一咏偕西厓前輩賦呈副相揆公

簞簞塢

雙竹廊

桐華書屋

蒼雪齋

巢山亭

荷塘

北湖

隙光亭

因曠洲

邀月榭

蘆港

柳泚

芡汊

含漪堂

釣魚臺

雙遂堂

南橋

紅藥欄

靜鏡居

朱藤逕

野航

次荅廖若村同年贈別原

韻二首

送陳秋田赴叙州長寧宰

棗東書屋大雨聯句

題潤木閉門采詩圖

牽牛作花十二韻索匠門諸子和

旬來多雨聞廣寧門外泥深數尺歸期踏踏書遣
悶懷 寄祝劉蓮菴光祿七十壽

有 詔於金州衛立水師營即以海賊之新就撫
者充其弁伍草野迂儒無從獻末議漫紀十六

韻 次和匠門雨中白蓮十二
韻 次韵匠門陰雨不止

六月十四夜久雨忽霽小庭涼月如秋五更起坐
即事成咏 喜晴次匠門韵二首

院長近以赤藤杖見贈合之前詩意蓋欲易我畫
义也作詩報之 立秋前一夕匠門席上作

立秋叠前韵用唐實常詩作起句

是日繆湘芷攜酒看就余寓餞別偕匠門秀野潤

木三叠前韵 次汪紫滄同年見送原韵

四首 立秋後三日匠門家集黎

園為勝會再邀余入座四叠前韵

道山亭在福州城內宋程公闢為守時所建曾南

豐為作記者也歲久傾圮林子鹿原得其故址

將築堂名以辨香蓋取陳后山向來一辨香敬

為曾南豐之句屬友人繪圖來索詩

警露軒鶴雛為鹿原賦

題樓敬思夢洗三硯圖二首

次韵奉酬院長西厓前輩贈行之句 附湯院
長原作

敬業堂詩集卷四十一目錄終

敬業堂詩集卷四十一

海寧 查慎行 悔餘

待放集

起癸巳正月盡六月

移疾經年遲遲去國恭遇

聖天子萬壽之期既

隨班朝賀復申前請又三閱月始蒙

恩允歸古

人以道去國者待放于郊得玦乃去春秋公羊傳

則謂大夫已去三年待放噫母乃太濡滯乎得玦

而去斯可矣

韓幹放馬圖次東坡題李伯時所藏韓幹馬七

言古詩韵

圖為同年薄勺庭所藏絹本無款孫少宰北海題其後謂是韓幹筆

一如鶴啄長鬣垂一如狼顧尾撒絲其一昂頭立而嘶

欲前不前耳卓錫眼中空濶視八極跼步尺咫胡由馳
薄言垌者在垌野絡腦且脫黃金羈人間皂櫪或老病
天上閑廐誰權竒攻駒考牧兩無預造物一聽相雄雌
圍官大得閒放意敵鯁遑問牛何之吁嗟乎隙中過景
越千載晝月晝骨空毛皮東川清絲况寸裂縱復神駿
疇能知斯圖即謂曹霸可弟子未必賢于師

今年擬不作詩復爲友人牽率破戒口占自解
年來百事多頽廢何必於詩苦用心正爾苦心誰復識
堯夫自有打乖吟

院長湯西厓前輩出示與副相揆公贈荅詩索
余次和六首

皇華候騎走駘駘万里還 朝倡和新何物堪持比詩
境冰壺玉鑑兩無塵

好士重聞六館開中間一館是翹材春風入座人人愛
只待先生下直回

第七車中博物餘承明顧問在星廬不知三篋三倉外
可有平生未見書

白楊巷與青楊巷多少車前騶唱聲何似神仙雙學士
對騎官馬出郊行

時揆公以副相兼掌
院故得並稱學士

文壇宿望與資深吟徧西垣又苑林三十年來同調盡

却從少和識孤音

後漢書孔融傳贊越
俗易驚孤音少和

翩翩和鳴屬兩公卷阿風入雅音中枯桐入爨還邀賞

草木終憐臭味同

題徐去矜侍御日南種菜圖

不費園官送渾疑老圃家苗民分七箸童子劬烟霞飽
喫三年菜閒看四季花還朝無俗物堪作畫圖誇

癸巳仲春上丁 文廟分獻紀事四首

森森老檜上叅天路入橋門氣肅然齋宿忝隨丞相後
先一日隨太倉相趨蹌獲在聖人前元音唱歎餘琴瑟
國省牲閱祭品

古器駢羅識几筵兩度春秋遞分獻一門兄弟儼差肩

去秋丁祭家弟嗣
栗與分獻之列

鸞縷翟羽互飛翔樂舞同時綴兩行道在羹墻榮北面
禮成盥薦屬東廂千秋世裔綿吳國言子舊封吳侯其
裔孫德堅去冬始

襲經
博

十哲新躋列紫陽朱子去春躋十哲配享廟堂
以上兩賢余分獻之位在馬到

此始知儒者貴遥遥今古幾升堂

自堂徂廡又趨階升降循環往復迴想像軒懸非一代

摩挲石鼓已三回二十年前為博士
弟子十年前釋褐頭銜分去出資郎

下班次猶煩博士陪宋祥符中孫奭上言釋奠舊禮以
祭酒司業博士三獻新禮以三公

近歲止命獻官三員兼揖請樽差太尉太常光祿卿三
獻詔可今至聖前則大學士行禮十哲分獻用翰林資
深者二員本監丞博士二員猶隨
分獻官後蓋參用宋時新舊禮也絕勝恢諧飢曼倩

殿庭割肉早歸來

題名釋褐幾何時衰至人嫌拜起遲奠年時余拜起稍
遲以致敬也導引

官遽相催
迫故云位定瞽宗寧敢讓致齋所序坐分獻
官在太常卿之上事關導

豆豈無司明朝尚舉分膳禮他日誰陳齒冑儀白首詞

臣稽掌故 盛朝文物古爲師

二月二十日雷雨之後忽復嚴寒枕上口占

老子慵貪臥家童起報晴朝來冰復合昨夜蟄初驚寒
暖渾難定陰陽動必爭庭花經手種榮悴也關情

後二日雪

欣欣逢歲閏靄靄及春陽早是經雷雨如何更雪霜天
心寧好殺物性自多傷草木如知候勾尖幸宛藏

出史記律書

恭祝

皇上萬壽詩四章

鳳紀龍飛五十年周天景運正中天衆星拱極雲霄上
萬國瞻光日月前難老祥徵 仁者壽誕生 聖在佛

之先欲知 帝力占毗俗擊壤吹豳徧八埏

爐香馥馥護 楓宸花甲循環曆象新 玉燭万年三

月節 鴻鈞一氣四時春闔門 典曠收群士 錫福

疇多及庶民黎老祝 釐還自賀兒孫同作太平人

厚澤深仁物物霑筭從動植到飛潛日暄風動 恩威

並 秉鉞垂衣創守兼久運 乾行神倍王 屢辭尊

號德彌謙太和宇宙無疆慶長願春隨閏歲添

極盛 皇猷冠古今無涯 聖學仰高深已隆咸五登

三業猶塵 堯咨舜做心 天大固知難繪畫人歡爭

欲效謳吟小臣拜手情尤切十載蒙 恩在禁林

題石門勞鈞天日邊鼓篋圖二首

文賦行當擬陸機鈞天年甫二十故暫從鼓篋別庭闈

同朝幾輩來相問五十年前父執稀尊甫中丞公甲辰進士至是恰五十年

過庭家學本傳詩都講風流又一時三百諸生多避席
愛聽匡說解人頤

山野老人遠來祝 萬壽者以千計目觀盛事
紀之以詩

長世人多壽親承異數加使年踰甲子問俗及桑麻跪
進觴 停輦歸簪帽有花賜醕還賜杖好向後生誇
雨後過自怡園看海棠同院長作時余復請假
不記名園裏辜芳醉幾回偶逢新雨過又報海棠開此

地嗟春晚當時見手栽勿辭燒燭看為是別花來香山詩七
十三翁難再到今
春來是別花來

四月朔大雪

大雪灑庭柯春光九十過急催花落盡亂雜絮飛多燕
壘融還凍鶯吭噤不歌紛紛蜂與蝶爭奈苦寒何

送同年海天植前輩視學雲南

八千餘里皇華使二十多年侍從臣館閣文章天上草
門墻桃李日南春先聲到處苗風變公道傳來士氣伸
儘讓同官開府去好持冰鑑答 楓宸

重過封氏園飲矮松下偕綱菴湘芷俠君潤木
作

刺蘼花外矮松前指點遊踪廿四年枝亞平行妨翠鬣
杖端摩頂透青天與誰作伴人先老閱世如流我獨憐
賣却朝衫充一醉免教歸欠酒家錢

再賦古松疊前韵

時聞松子落吾前小住方知日似年草色展開三丈地
濤聲捲起四垂天最宜物外閑相賞久在人間絕可憐
莫道如龍難畫得真龍又值幾多錢

時潤木畫墨松旁
觀有譽樹爲龍者

故戲
及之

從刺蘼園步至陶然亭

未覺年衰腰脚頑意行隨步有躋攀雨餘天氣清和候
城角人家墟墓間栢子庭空移白日荻苗水涸轉蒼灣

此來直與孤亭別貪得憑欄一晌閒

壽山田石硯屏歌副相揆公屬和

吾聞陽精之純韞爲璞白者曰璧黃者琮兼斯二美乃
在石天遣瓌寶生閩中壽山山前石戶農力田世世兼
養蜂採花釀蜜自何代金漿玉髓相交融深埋土肉久
成骨亦如虎魄結自千年松想當欲出未出時其氣貫
斗如烟虹地亦愛寶惜不得飛上君家几硯爲屏風質
良材富肌理豐廣袤徑尺加磨礱銀河中傾灑激水灌
頂倒擢崔嵬峰寒光通透月兩面高勢噴涌雲千重長
檠夜燒燭焰紅表裏映徹疑中空風林片石非爾比况
許下巖劣品矜芙蓉朝來得句傳詩筒語雖紀實工形

容平生嗜好一無癖而此特爲情愛鍾吁嗟乎人間尤
物蓋不乏目所未覩誰能窮公今獲石石遇公無心之
合欣遭逢深山邃谷只作几硯視要使天下稱良工

循例請封典有作

馳封有例徧簪裾院吏傳宣到敝廬一榻春生衰病後
九重恩逮罷官初絕無功狀虛糜祿自寫年勞削勘
書慙愧初階叨進級枉將章服混樵漁

自怡園曉起即事呈副相

朝來雲出岫昨日雨鳴溪杏子落如豆楊花膠作泥新
巢看燕乳舊耳聽鶯啼

去年四月公有曉起聞鶯詩屬和

詩境從閒得

何須苦覓題

獨坐紫藤花下

俗客何由到但聞蜂蝶喧低枝如見就長穗不勝繁稍
重雨欹架忽飛風滿園冗員無處著

東坡詩冗士無處著寄身范公園

來借紫花墩

食新筍

朔野無修竹名園擅辟疆舊皮留虎豹

昌黎筍詩看皮虎豹存

新

角茁牛羊淪取庖厨潔饒生七筋香一餐真過分

梅聖俞謝

韓持國貽筍詩今年得此謂過分不似在他鄉

放船至因曠洲

露氣烟光潑眼青蒹葭影裏覓孤亭藕梢過港又生葉
柳絮逐波多化萍鶯語忽流何處去漁歌合向此間聽

老夫大有江湖興肯讓閒鷗占一汀

乞長假留別院長揆公二首

北道嚴裝日

院長將邑
蹕赴口外

西窗剪燭時兩心多戀戀分手

故遲遲欸曲行藏計纏綿倡和詩桑榆收已晚後會恐
難期

示疾非無疾藏名亦有名難窮惟佛理易足是官情聚
散人誰免蹉跎我此行半生知己分投老荷相成

雨中發自怡園再呈院長

迴思風雨追隨地多在園居少在城草木因公皆可敬
東坡詩醉翁行樂
處草木皆可敬禽魚與我豈無情編年集換新題目
署尾牋留舊姓名從此高吟應寡和更無人繼老門生

附院長作

揆叙

一醉筵前各異程迢迢沙塞與江城欲攀征蓋終無
計苦挽歸航似不情風雨每思償宿願亭臺還請署
新名從今裂帛湖邊月長照離人白髮生

車中遇佟陶菴同年

三年不見故人詩一笑多成世外期君自愛閒求退早
我方移疾得歸遲萍踪浮海相逢地柳絮隨風欲散時
莫怪下車還久立老來光景怕臨岐

吳寶崖以西苑龍棚詞百首新刻見貽兼索題

句四首

朝為百賦暮千詩敏捷曾聞崔立之何似吳郎新樂府

一時紙價貴京師

好譜新聲付樂工半參商調半參宮二千八百驪龍顛
併入歌珠一串中

員嶠方壺咫尺移太平景物万年期丹青繪出殊難尙

輸與文人絕妙詞

時少司馬宋堅齋奉旨繪圖

他人才少爾才多珥筆差堪上馭姿可惜得官偏落第
不曾名占百篇科

端陽前二日薄勺庭招諸同年集王園芍藥花

下

綠陰十里豐臺路來趁名園芍藥期良會轉憐經歲少

自去年以來久不舉同年之會

好花偏愛閏年遲江郎一夢才輸錦小

杜三生髡有絲珍重故人尊酒意將歸時節咏將離

酬別陶菴同年六首

出門袞袞怕風塵見面睽違動隔春形跡校疎情校密
可知俱是嬾朝人

入同珥筆出隨鑿幾載辛勤共跨鞍今日車中思馬

上皇恩直似五湖寬

歸期已是一年淹辭祿能無缺乏嫌慙愧故人親致贐
拜嘉祇恐或傷廉

河梁錄別意如何真有長歌續短歌不待吾言君自信
傳人一代本無多

段家橋外木蘭舟唱和曾同扈蹕遊却與歸人添別

恨獨吟怕上望湖樓

君才畢竟爲時用我老長甘與世辭

王右軍有辭世帖

聚散升

沈渾細事人生難得兩相知

題宋蘭暉潯陽送客圖

聊借琵琶寓苦吟多緣淪落望知音後來信有商人婦
直被香山賺到今

題程蒿亭持竿圖小照

已遮西日向長安尚想臨流把一竿寄語能詩疾叔迨
求魚沮如古來難

晚香長老六十乞詩

紅椒上人年六十世壽從頭數甲乙朝來隱几夢青山

過我殷勤約歸日我今面皺眼昏花師亦瘦如枯木查
童時觀性依然在同閱恒河無筭沙

陰雨連綿頗似江南黃梅天氣

乍陰乍晴鳩效巢半濕半乾蚓出土南中五月熟梅天
北地應呼杏子雨

送蔣樹存出宰餘慶

憶昨領書局群英集金鑾蔣生預校讐臭味吾芝蘭趨
階或聯步會食恒同餐六時數晨夕三歲離暑寒書成
上御覽名姓列簡端聚散夫何常如沙孰能搏同儕
三十輩一一爭彈冠我已病乞身子行方得官不以出
處易儼然平生歡叩我蓬蓽門送迎諒踳跚谷風有遺

棄責善人情難古義胡足論世途良可歎子今又遠別
迢遞赴花蠻黔俗我所諳雁戶雜猴獮陰多晴日少霧
氣昏漫漫長吏雖難爲苗民豈真頑寶輸况無幾期會
務使寬訟簡案牘稀地遐心跡閒時時弄筆墨哦咏于
其間亦足以自娛因之報平安好音望頻惠綿邈非關
山

乞歸候 旨未得成行寓庭雜蒔草花用以遣
日吟成四首

歸心一以動如馬渴思騁乃復繫維之動中反吾靜于
焉寓草木幽事閒稍領既裁須有溉生理視俄頃未免
擾隣家朝朝汲甘井

瓦盆列羣卉紅白非一種經旬排比開含意似矜寵閱
人成日暮偷負力何勇取咲桐栢材十年方把拱
開亦勿德雨謝亦勿怨風榮枯兩適然了不關化工化
工倘徇物毋乃與物同所以老子懷痴頑若孩童
京師看花人汲汲需代置主少十日情市多三倍利方
從擔頭買旋向墻角棄不念花有根初爲悅目地賞新
宜置舊何用發深喟

次日社集張匠門齋同人皆和余種花詩再疊
前韵四首

平生數交遊湖海浪馳騁邇來嗜好別取友亦取靜與
君隣巷居跬步煩引領濶疎輒累月會合或食頃一咲

兩心同無波如古井

君鬚尚鬢鬢我髮已種種引諸同調未推許荷光寵栽
花坐無慘決去愧不勇焉能久鬱鬱而待宰木拱

草木茁苔穎好詩來清風中有元氣存豈謂屬和工群
公富揮灑下筆無雷同挹彼山下泉爲余發蒙童

造物閱古今生生本無置何論材不材固有利不利晚
容桑榆補蚤恐牙蘖棄願將種花心移作樹人地毋使
後來者仍滋慨然喟

題王石谷爲張超然畫旌節圖

王畫此圖
九年始成

張母早喪夫張子幼無父却將歿後榮報荅生前苦有
鹿不觸墳上松有鼠不穿墻中土天生異類猶多感孰

謂人情不如古王君作畫踰九年此事此圖皆足傳我
詩豈獨稱子孝亦使後來知母賢

去夏手植盆榴二本今年一枯一榮有感而作

庭下兩盆榴經春謂已萎其一雨忽生病夫眼雙洗枝
端抽綠葉葉底粲紅葢葢綻復吐花花殘旋結子依然
還舊觀去聲慰我岑寂裏生存日向榮死者爲薪矣有情
兼弔賀感歎爲賦此

院長貽嶺南椰子

椰子產番禺垂大如斗其皮堅以鞞既剥且難剖誰
致越王頭齊民要術云椰子其俗謂之越王頭不脛而北走微凹陷兩目

鑿竅通一口轉側初有聲俄傾半升酒東坡椰子冠詩半升僅漉淵明

酒間吟出既醉義愧餉師友
梅聖俞謝李獻甫餉柳子詩我獨愧先生饌致崇師友

林鹿原餉武夸茶

頭綱拜賜吾何有細色徒聞馬上誇
何法商量好消渴都籃分得大窠茶
梅聖俞新茶詩大窠有壯液所發必奇類

木本金銀花十四韵

本是沿籬蔓今成傍砌栽瘦根形促縮短梗狀堆厯鳥爪拳筋立蛇皮換骨來忍冬經凜烈入夏應恢台長乳層層發幽花對對開雛鶯飛閃爍小鶴舞瑤璫蝶粉悠揚墜蜂鬚颯灑迴金銀分老穉黃白變胚胎最好清含露尤宜薄戰雷痛須芟冗葉惜勿剪條枚就影移書案留香泛酒杯資生無秘術入藥即良材病檢醫方熟閒從物性推不貪能識氣衆眼漫相猜

庭西牽牛子新苗競發喜成十韵

手種牽牛子根株粒粒成勾尖看乍破兩葉喜先萌
驗長論分寸爲時閱晦明立苗防細弱插竹與扶繫
遂有纏綿意偏多附麗情疾風從偃仰猛雨賴支撐
地力隨肥瘠天機示發生幾時花逞艷連日蔓交縈
寓目聊充玩消閒亦強名料他秋爛熳我已赴歸程

和張日容嘲薜荔二十韵

薜荔爾何物纖微孰比方胡然纏宇下只合繚崖旁
歧歧工綠壁離離巧翬墻性因柔善附地以瘠爲良松栢

寧勞施絲蘿故自張龍鱗移不易

宋史李彥發物供奉大類朱勗如龍鱗

荔一本葦致之費踰數萬

蛇蚶斷無傷及見縈根密俄驚引蔓狂嫩

佛典呼餓鬼為辟荔

莖繩絞繳大葉羽披猖山鬼依棲暗

佛典呼餓鬼為辟荔

託荒罔惟憐屈宋

九歌罔辟荔而為帷

靡席咲班揚

甘泉賦靡辟荔而為席

雜蕙紉為佩輸荷緝作裳攀枝頻颺影貫藻罕聞香

貫薛荔之落葉

好補青藤援休侵白玉堂移文累芳杜

北山移文豈可

使芳杜厚顏

作賦混蓀蓂

張衡南都賦草則蓀蓂若薇蕪蓀蓂

誰遣臨

書幌兼能罩筆牀有時經雨潤逐日領風涼梢自隣家

放陰留夏景長卷簾交竹翠曳杖點苔蒼大抵詩騷意

多從諷諭將勿嗤吟小草中有好篇章

晚香長老贈桃枝竹杖

六尺桃枝杖將歸荷見投健添居士足高出老僧頭與
鶴誰先到為龍寧久留撥開塵土窟遲爾入山遊

同人集棗東書屋分賦二首

春偷桃杏妍夏竊芙蓉艷秋榮雜桂菊冬至亦時歛樂

子之無知多將四時占

月季花

小小黃金花媚人如自獻聊陪今日賞適我他方願衆

醉敢獨醒不勞持盞勸

金盞花

汪陞交郡丞屬題負米讀書圖時將赴任潮州

即以贈別

汪子客京華氣豪心悒快高堂有母在恒結白雲想皇
天憐斯人得舉甫一上南宮輒唱第盛事快探掌早知

給舍官不及州邑長題輿行佐郡得祿猶逮養潮海萬
里程翩然捧檄往過家拜白髮喜氣春盎盎却憶負米
時悲喜異今曩平生讀書力篝火依績紡食報理必然
問言受如響丹青非苟設風義行可廣題作贈行篇披
圖愜神賞

題故汶州太守潘君畫像

士當未遇時往往慕好爵及乎嬰世網又想田園樂田
園豈不好世網多被牽興罷乃徑歸斯人得非仙廿年
客京洛未識斯人面山光竹影中髣髴如相見

送同年劉大山應名赴行在三首

且喜南冠不到頭復趨幄殿侍宸旒恩威天大殊難

測去住身孤可自由沙澗草香知麝過林蹊月黑見螢
流識途老馬今閒放歷歷從君話舊遊

行行莫慮出關遙司馬臺東景色饒禾黍連塍無棄地
松杉夾岸有浮橋霜收野果丹砂實雨剪山蔬翡翠苗
一段閒情知不乏也應問答到漁樵

弱羽廻翔又一時鍛禽來拂鳳皇池重回蓬島游仙夢
別擬山莊應制詩眼望青冥行得路心憂白髮見無
期臨岐直是難爲別二十年來兩故知

畫義

我有古玉器裹諸片青檀烟如一鈎月映出初三天纖
纖銳兩頭弓勢未扣弦下連徑寸靶中窅外規圍愛惜

徒手摩致用無由緣昨得桃竹杖肌理細且堅命工稍
斲削冠玉于其顛呼之曰畫義古製想當然東坡昔居
黃刺有掛壁錢持义日取百月費猶三千我今已鐫俸
仰屋方高眠夫豈有餘資貫穿梁上懸义成等無用一
笑仍棄捐何如刻作鳩扶我歸農田

題王石谷山水四首

浮嵐暖翠望重重幾道清泉出古松知有僧樓尋不到
似聞一杵隔雲鐘

水滙山環去復回林端無徑不梯苔石梁果與天台接
可許人間肉馬來

想當潑墨目無前董巨源流却井然天下溪山皆粉本

空中結構是雲烟

朱瑤晚輩今多少真蹟尤須愛惜看見說山人年八十
白頭重畫此圖難

留別潤木即次弟送行原韵四首

誰能問舍更求田車自今懸室早懸久病我忘官爵好
同朝人羨弟兄賢魚隨水退先歸壑鴈逐雲飛尚各天

時德尹嶺南未歸

若是登真須拔宅良常何敢獨爲仙

幾夜連床聽雨聲却教離恨此中生貧思飽煖原奇福
老戀桑榆亦至情出處多岐非意料去留無累稍身輕
只愁五十平頭客婚宦何時了尚平弟今年五十矣
指點林廬眺望賒曉隨門鵲暮棲鴉桐爲先世成陰樹

池上梧桐 先君子手植二十年前已 桂是吾家及第
合抱宋人稱韓子華兄弟為桐樹韓家
花 吾家廳事前銀桂五株自癸酉以來每逢科詔兄弟
子姪輩有獲雋者必發金花一枝為先兆歷歷不棄
屋後籬疎須補竹墻西地瘠想宜茶得歸已乏躬耕力
種植書中課有加

事兄慙愧竟如師至性怡怡實在斯何日始酬借隱願

向人羞乞買山資夢餘得句憐靈運膝下成名愛阿宜

杜牧與姪阿宜詩連年擢科第若摘領
下髭時五姪克紹新舉京兆故云然 此外升沈皆分

定吾言雖淺要尋思

留別詩社諸同人次張匠門見送原韵

去住何關此一官衰年只別友朋難烟霄過眼看如霧
草木論心臭比蘭身在夢中誰獨覺事當局外每長歎

是間著我初無謂獅子林中一野干

禪宗語錄有野干
隨逐獅子終不成

獅之語

白頭白盡想巢南早署菴名未有菴朝跡已收雙屐在
歸裝猶累一僮擔高僧瓶鉢原初約老圃桑麻豈腐談
多謝故交頻戀別尚容諧謔互相參

匠門以瓶蓮十二韵索和次荅

脉脉凌波質朝來帶露攜出鉞看蕊綻照眼得花齊長
養仍資水清幽更洗泥畧教分向背初不競高低欲語
殊多態何愁自少啼艷將同洛浦愛豈獨濂溪有客尋
池上無魚戲葉西依稀能忍咲綽約好防迷顧影移秋
蝶分香夢夕鷺暑颺迎澹澹涼雨避淒淒立傍屏風鷺

談親塵尾犀涉江吾擬采先與報箋題

題吳寶崖在山讀書圖即送其出宰在平

無事飲犀首亡何飲袁絲飲之爲功固不細阮能罷哭
陶忘飢張芝李白大暢此中趣可以狂草可以詩逃名
混跡靡不取獨於從宦非其宜何況邑宰寄民社設遇
煩劇尤難爲吾黨吳生性耽酒其人磊砢而英奇今將
行作吏得縣古名在在山袞袞東南陞有水雲雲西北
馳中間曠衍百餘里厨傳四走當衝達似聞齊俗夙健
訟邦治邦法難兼施書生習氣要一變嗜好勿使旁人
窺仕而優則學二者恒相資公餘讀書良有味絕勝干
鍾百榼痛飲誇淋漓勸君可止則徑止未能遽止請損

之贈行實關朋友義吾言雖戲庶可以箴規

諸君爲余作桃枝竹杖歌余亦自賦一首

勞不得及奔馬逸不得乘安車飛不能群衆鳥游不能
隊潛魚無端人趨我亦趨倉卒一蹶誰當扶七尺之杖
六尺軀 聖恩寬大容田廬歸與歸與吾與爾俱杖國
雖不足杖鄉已有餘

苦熱

不辭河朔飲酷暑竟難逃高屋同炊甑輕裕劇溫袍石
欄乾迸火松柱液流膏嗟爾巢棲者多應厭羽毛

題莊書田笠屐探梅圖

杜家亦有笠謝家亦有屐何必眉山翁區區擬其跡身

挾冰雪骨貯冰雪文但遇梅花開入山尋白雲白雲
舊在題詩處畫裏溪山能久住君今笠屐且閒拋借與
歸人作遊具

仇山村詩翰一卷乙丑秋於竹垞寓齋見之借
故友魏禹平題名其後未幾此卷歸吾鄉高文
恪公又二十九年癸巳公之孫礪山攜至京師
屬余題句存歿之感愴然于中聊附數言以志
歲月

四百餘年翰墨新流傳重是宋遺民論詩正爾空當代
展卷渾如遇故人世閱古今雙轉燭事關存歿一傷神
先公手澤依然在肯使桓厨賡亂真

題鄭寒村爲魏仿韓畫棲鶴圖二首

鳧雛鴈子影參差
窈羽群窺浴鳳池
爭及寥天秋一鶴
巢松獨占舊高枝

攜將鄭老一幅畫
來索查田七字題
我是人間退飛鷁
相逢只愛說巖棲

題泰州宮氏春雨草堂圖

于野去山遙環城爲水滙
草堂築其上春雨名猶在
老木皆十圍湖黿兀硯磊
問君今幾世物色舊無改
正賴後多賢畫圖益精采
鯉魴富罩山蝦蜆蕃菹醢
樵去唱烏鹽漁來歌欸乃
路迷葭葦岸舟出蒲蓮海
我欲溯回從蒼蒼隔煙靄

觀蜘蛛布網

小童持竹竿簷角除蛛絲既除旋復吐日事經營爲爾
網密以張爾腹恒苦飢羽蟲投一目所獲良已微並生
天壤間動者羅禍機兩皆置得失且復吟吾詩

洗象詞五首和顧俠君

畫鼓聲中緩步來紅旗影裏撒波開都人六月汗如濯
慣是一年看一回

俸料新加例有無尋常已飽大官芻被他三品閒鷗咲
出沒成群聽象奴

兩齒齶然臂聳然老于槽櫪浴于川就中云有前朝者

曾見

天家破賊年

相傳李自成僭號登極時象
有流涕者入本朝馴服如故

角壯浮深去復迴舊鞍重與拂炎埃也應三日同休沐
辛苦終年立仗來

衆裏觀場老比丘粗從三喻識沈浮
兔迹馬跡紛紛渡
徹底輸他是截流

題俠君嗽荔第二圖

醴泉甘露吾不知人間絕品惟荔支惜哉遠落閩粵徼
爲候又與煩蒸期四月則太早七月則太遲佳者熟當
小暑時闌風伏雨交紛披炎官火傘赫赫曦養成姑射
仙山肌冰丸雪片不受嚼化作涼液沁入人心脾我昔
遊閩遇歲稔日噉四百五十顆有奇爾來喉吻久枯澁
北果厭摘頻婆梨故人密漬或遠致四三五枚蒙見貽

色香味三了無取但覺一甘入頰膠如飴十年夢寐西
禪枝仙蹤縹緲胡可追顧侯好事乃過我閩產粵產兼
嘗之初嘗得火山名雖曰荔格實卑繼而得挂綠漸入
佳境方稱奇生綃半幅寫不足擬再乞畫還徵詩今君
已為一組縻畫餅說食徒爾為我歸大作口腹想嶺嶠
雖遠不過天南垂鷓鴣孔翠成羣飛老夫興發神與馳
齒牙缺落舌尚在清泉涌穴菽菽先流頤

藏經匣歌

并序

匣漆皮為之無縫不可開相傳古羅漢寫藏經銅
其中長三寸許濶二寸許厚不盈寸正面畫佛像
一尊背及四旁俱有梵書西域喇嘛僅識其半云

此大西天字也彼中奉為法寶流入中國者七部
四部藏匣內三部藏佛腹中好事者敬視壞其一
今在人間者尚有六部此其一也佩之水火盜賊
不能傷魍魎魅不能害云中州李庶常牟山出
以見示成長短句一章

毘勒最初藏三百餘方言後人憶誦少從簡刪其繁餘
存三十八万四千字梵夾秘在菴羅園

大論云毘勒藏有三百二十万

言佛在世時所造後人憶誦力少不能廣誦換為三十八万四千言 四十二章經流入震

旦同河源六朝南北洎唐代高僧輩出如雲屯兩伊合

新舊西方有新舊兩伊猶此土之篆隸悉本經義為譯翻後來廣增律

論部與經為輔傳仍昆白馬詎勝馱劫火安能燔云誰

收入方寸篋三藏奚翅千千番相傳阿羅漢恐是須陀
洹手摹梵天書流布于九垓中國凡七部一部已壞其
六存六部之中此其一佩此可以安神魂洵若彼所云
西江一口何難吞吾聞釋迦教率以譬喻論有如須彌
山納一芥子大海水吸玻黎盆細入無縫大則包乾坤
撮搏寶掌成胚渾世人自昧真實諦暗鎖白日長昏昏
疑者以爲無空諸所有胡得焉信者以爲有實諸所無
非本元語言文字互膠擾證入不二于何門安得霹靂
手稽首兩足尊鑿開真函破妄見是則名爲報佛恩

咏周尊彝十六韵

形方而隨兩耳四足中有古篆魯公作文王尊彝七字無

銘詞歲月可考

三代多銘識圖從博古援世惟金石壽今覺鼎鐘繁

山文公侯復始鼎鐘逾繁

此物傳周器何時入國門問名充象著索

價重瑤琨魯國年無紀姬公典幸存啟封從聖子近裔

屬文孫大祀新宮煥東藩古制敦

少陵詩宗卿古制敦

百籩借簠

簠五獻設彛樽螭虎形差肖夔踞勢若蹲比劍安足穩

似鬲取唇反

平叶

上聳環堪貫中虛腹可捫規模因樸著

容受以升論黠黠苔封色依稀土蝕痕俯將輕漢爵前

欲媿商尊俗已無精鑿評難定一言會逢歐趙輩重與

考淵源

諸同年醪分餞行于陳東之寓樓即席留別四

首

來迎華蓋出朱輪九陌炎歎万斛塵慙愧曲江諸舊好
綠槐陰下餞歸人

有約難隨座主行

許座師于一月前南歸
余乞假之 旨未下

秋風漸老碧

芹羹濟時心力輸公等只好江東作步兵

鵝鸞隊裏一沙鷗飲啄曾同十載遊今日分飛憐隻影

煙波滿眼又回頭

戶小先擠入醉鄉解衣盤礴自生涼定知此後同年會
故態猶能記老狂

自怡園二十一咏借西厓前輩賦呈副相揆公

篋營塢

游人裾上塵馬跡門前路一徑轉琅玕蒼然三里霧

雙竹廊

七松少傅宅五柳徵君屋輸此十步廊天生兩竿竹

桐華書屋

亭亭百尺枝下陰一欄翠童子正開門桐花風滿地

蒼雪齋

碧玉方開籜量成六寸圍濯枝多雨露新粉欲沾衣

巢山亭

遠移三疊屏突兀凌空起勢壓小亭低前臨一潭水

荷塘

記得初移藕田田貼水荷香風隨權遠花枝去年多

北湖

放眼際遙碧近身葉似舟鴛鴦最相戀驚起却回頭
隙光亭

一片平頗黎穿林光瑣碎閣欄如鳥巢隱隱柴其內
因曠洲

洲勢極空曠分幾派江因添方丈室面面與開窗
邀月榭

月出東皎皎月落西茫茫有時夜無月倒影搖湖光
蘆港

春漲今年足蘆根上岸生人間正炎熱物外已秋聲
柳汧

千株万株柳夾浦濃于黛忽度一聲鶯濛濛烟雨外

芡汎

芡是吾鄉實充盤憶水羞羨君池汎上兩處種雞頭
城居在雞頭池上
長院

含漪堂

涼從何處來適與披襟遇風過水微波于中得佳句

釣魚臺

璜溪坐姜叟濠上游莊周果若知魚樂不妨施直釣

雙遂堂

心跡既雙清宦游亦雙遂一事勝香山公頭白猶未

南橋

兩厓石齒齒一壑流濺濺橋北與橋南仙凡此分界

紅藥欄

手自栽紅藥旋開穩重花禁中吟未足歸到日西斜

靜鏡居

先生靜多妙跡顯心逾靜借問祖師禪無塵安有鏡

朱藤逕

十萬寶瓔珞舉頭迷下上好咲王君夫紫絲開步障

野航

野趣隨所寓陸居同水宿偶以舫名齋已忘舟是屋

次荅廖若村同年贈別原韵二首

六人三載同書局出入群聯鴈一行

武英殿編輯韵府余與若村吳山掄

宋山言汪紫滄錢亮功六人皆癸未同年也

自比蟲魚辭蠹簡忽投珠玉滿

奚囊感深紈扇秋風篋夢散宮衣舊日香敢對離筵論
後會直緣情重不辭觴

此身無用且分飛却望晨霞阻夕霏竹簟暑風攜枕去

蘆塘秋雨待船歸長留異日心期在莫謂同門出處非

李頎詩在昔同門友如今出處非

好片泖湖烟水色願隨老鶴息塵機

尊公先生余癸酉同年聞尚有彈冠之興故云

送陳秋田赴叙州長寧宰

鈎棧連雲幾百盤漏天南去尚漫漫一身多累無長策

万里嚴程似左官小邑攜家須約俸故人臨別勸加餐

輿圖盡處江山麗只作當時荔浦看

君前任荔浦自言山水極佳

棗東書屋大雨聯句

炎歎釀昏夢猛雨發疲曳郭雙補天潛女媧射日恣后

昇宮怨銀界指河傾畢躔知月離木潤三光乍弛職九野

悉蒙翳野顧秀陰陽兩相賊水火時為帝得非崑崙囚倏

受顛頊制餘悔暑路舞商羊朱波騰黑蜈芷醑塵鉅鹿

戰奮助昆陽勢谷汪退電母掣礮碑雷公拔精銳張匠蛟

螭牙爪活虎豹股栗斃急點繩脚粗密飛絲縷細郭簷

垂匹練下庭漲立談際宮奔渾赴溝渠森莽連埤坵森

森竹箭直滾滾浮漚繼木潤大麓易以迷繁星恐不繫顧

巢飢有鳥啄葉啞無蜩嘒是處長蓬蒿何人理蓀蕙餘

群淹窘歧息烝涉愁厲揭繆入市泉盪舟行泥禹乘櫬

汪車輕難就孰馬怯失奔踈張滑澁喜兒童沾濡憐僕

隸郭盆荷卸浮辨林果脫危蒂宮青沈兔目槐翠刷龍

鱗薛木潤柳腰任自誇葵足寧煩衛顧醜石苔髮披枯槎

菌釘贅餘悔鶴鳴蟻封徙蚓弔蛙坎瘞繆陰穴咽暗啼高

翹惜華毳汪鷹鷗尚屈猛燕雀盍少憇張万里覘郊畿

八埏首幽薊郭遙傳地欲浮仰視天方憐宮泔泔衝塞

去岌岌排墻逮富粟慳賣珠貧薪劇剉桂木潤西北正愁

霖東南想連暇顧金隄做捷帚薄產關種藝或者太浸

淫將毋成滲沱可無魚鱉患且免蝻蝗蔽農占覲有秋

王省實惟歲餘悔丞相調玉燭至尊執寶契繆早滂互

乘除豐凶恒酌劑汪吾曹復何事良會况有例張雖非

酒為池幸以瓦為袂郭居人宅如泛過客駕頻稅宮何

勞禁足方自頌安心偈潤木詩社得陶潛飲徒偕蔣濟顧

遠坊輪蹄散深坐吟箋遞借驢罷朝謁跣屐寡叅詣宴

樂需雲宜括囊坤象閉防虞沈竈事倉卒移床計餘零

瀝似啁晰傾倒敵懍悞繆閒齋一喧寂浮俗等塵壘汪

盤餐省癡蠅墻堊剝牡蠣張嗟我孤影形愛君好兄弟

束帶已發狂解衣復成噫筵攜吹月瑄袖挾掃雲篲索

醉來已遲忘機止或泥郭流連永今夕唾涕棄一切從

教清漏移莫問明星晷刻殘三寸燭哦出五言製手寫

類蠶眠口占非獺祭潤木摧頽興易盡爛熳詞多綴瞥眼

過氛烟倒頭成夢窳去將荷篲笠歸及鼓舟柁老翁何

所求却立望秋霽餘

題潤木閉門采詩圖

予初僦居槐樹街尋常兩板何曾開開門偶爲買花出
一月上市凡三回長椿寺前紅紫銜木本價昂草本賤
買其賤者兼取多意在閉門觀物變煌煌自昔帝王都
眼中變幻何所無無情草木有榮悴况此假合成形軀
色塵未透初禪界昨者采詩今采畫坐消光景向閒曹
何日粗償焚券債故園松菊荒荆榛花間夢斷如隔晨
當時看爾年最少已是半百平頭人我今念念成枯槁
輸爾圖中顏色好遲留且耐十年官六十歸來未爲老
牽牛作花十二韵索匠門諸子和

過雨簾櫳潤微涼院落幽老翁開咲口小草拆花頭名

自雙星得時將大火流若非經閏月已是報初秋綽有
含風態其如見日愁霞朝房早斂露夕蕊重抽續續如
相替匆匆可自由及時催絡緯連類况蜉蝣豔極那能
久嬌多孰比柔且依行藥徑勿傷曝衣樓急景何顏駐
餘光瞥眼休似憐歸日近作計與勾留

旬來多雨聞廣寧門外泥深數尺歸期蹭蹬書

遣悶懷

天行當溽暑水勢汨郊原歸計尚難料世途安可論投
床聽暗雨倚杖望初暝賴有同心友衝泥一扣門

匠門
車騎

見
過

寄祝劉濠菴光祿七十壽

我昔皖上遊過君之里第南陵好山水風俗古不替君
時已挂冠鄭重敦夙契開園設几席話舊接襟袂次第
見諸郎森森盡蘭桂一別十八年回頭如隔世聞君今
七十精采溢顏際室有參語賢齊眉正同歲全家多道
氣此福天所畀養壽得竒方烟霞閱清閼假如在高位
已合懸車例何似白樂天林泉早爲計

有 詔於金州衛立水師營即以海賊之新就
撫者充其弁伍草野迂儒無從獻末議漫紀十

六韵

詔設金州戍今爲要害城水軍嚴約束海寇戢縱橫控
險非榆塞分屯異柳營渠魁推作帥丁壯籍爲兵甫脫

檻車困還加鞶帶榮戰船齊魯給餽餉薊遼并貫罪
恩良厚優降事不輕波濤通外國帶礪近陪京欲以招
餘黨因之息遠征 睿謀虛聽受廷議集公卿實藉網
繆計俄聞贊畫成聚蛇爲窟穴圈虎傍茨荆鷹眼終難
化狠心故自獍徒戎宜有論賞賊似無名世孰防牙孽
人方恃太平區區誠過慮咲爾一鯁生

次和匠門雨中白蓮十二韻

玉井如船藕移來是白蓮花開元澹澹雨洗更娟娟出
浴全身潔離塵一鏡妍細珠留的皪活汞走勺圓太素
知無匹孤標儼得仙靈根超十地色界淨諸天影濯銀
河畔香清羽扇邊質迷深自隱絲引誤相牽帶咲聊悠

爾李群玉詩處
世心悠爾

含悽莫泣然凌波愁浪惡傾蓋望雲穿

江浦舟遲泛湘臯佩合捐輸他冰雪咏孰與鬪便娘

次韵匠門陰雨不止

兼旬雷失威入夜雨尤猛欠伸局腰脊靡騁瞻項領流
惡溝瀆盈居汙箕箒屏千門烟勃宰九陌路壅梗童出
怕淤泥婢炊愁濁井桁衣變黻黜僕被感单冷庭作沼
聚漚簷爲瀑垂綆誰歎請祈禱古者有修省澤馬兆何
祥坎輿戒多青青吟召蝸蚘怒叫禁蝮黽庶令沴氣消
徐俟曦光晒人胥出淪溺吾亦散憂耿世事疾轉圜天
心易翻餅勉旃毋多談行矣需少頃歸途指蝮螻去意
隨舡艫此時咏君詩有味彌雋永

六月十四夜久雨忽霽小庭涼月如秋五更起
坐即事成咏

夜靜窗微明雞鳴曙猶未攬衣步庭下簷溜初止沸斜
月在西南殘雲風掃旣銀河洗我目玉露清我胃一涼
襲虛襟餘潤及群卉流光閱醉夢好景失聾聵獨有無
寐人先知秋氣味

喜晴次匠門韵二首

正爾巡檐嘆伏陰忽開霽色見天心月將東出氣尤爽
火已西流炎不侵

後三日
立秋

赤脚一雙休踏履白絲半頂

喜抽簪呼童急掃堦前地準備高人策蹇尋

勿論熱熟與生疎

禪家有熱熟
處求生疎語

閉戶多時出少車隔宿

傳詩邀客和歸期檢曆遣兒書徑鋪嫩蘚瓊相似盆豔
秋花錦不如更貫迎涼一瓶酒此間何事可愁予

院長近以赤藤杖見贈合之前詩意蓋欲易我
畫義也作詩報之

昨以病乞假先鐫半年俸挂杖坐無錢棄杖辭寓諷實
則心愛之時時手摩弄貧家乏冗物一竹當兩用挂畫
乃名義隨身即爲從先生欲巧取猥以赤藤送此藤產
塞山年深蟠石縫細筋漸成骨直理透條綜堅如鐵鑄
成亦可扶躡躡壁來田不往曲直何足訟平生車馬裘
義取朋友共於茲獨有恡貪得比藝種挾兩詎爲多失
一宵輕縱公廉忍見奪我寶彌增重幸賜雙杖銘俾得

終身誦

立秋前一夕匠門席上作

此會循環忽五年老於交誼倍依然何曾清景辜風月
又聽商聲入管絃齒序慙余居客右詩成君官讓誰先
眼前看是尋常事或有人從異日傳

立秋疊前韵用唐竇常詩作起句

笑老重經癸巳年况逢秋至轉淒然露瀼梧徑蕭蕭葉
雨上琴床緩緩絃是日復雨万事蹉跎羊視後一帆迢遞雁
爭先候門知有兒孫在烏鵲連朝喜浪傳

是日繆湘芷攜酒肴就余寓餞別偕匠門秀野

潤木三疊前韵

風雨相留欲判年足音蓬藿喜登然情知老馬難回策
目送歸鴻又拊絃擘紙聯吟豪鬪健圍碁賭酒怯饒先
時與匠門對局賭酒互有勝負良辰一醉誰拋得生怕狂名被俗傳

次汪紫滄同年見送原韵四首

鱗思反壑羽投林知我誰能諒此心引疾敢云臣計早
得歸尤荷 主恩深裝輕似葉行添杖筆秃如椎懶廢
吟只有故交忘不得每從別賦感登臨

新詩字字比驪珠懷袖分光照座隅畫裏烟波鷗境界
燈前風雨鴈程途金蘭義重言多苦藥石功深病或蘇
却咲迂疎真不揣欲將農圃傲蓬壺

月華南畔浴堂邊形影相隨近十年雲步改遷尋丈地

霓裳吹散大羅天。曾叨香案稱清吏。誤籍蓬池作謫仙。
努力文章留報國。尚餘殘局在芸編。

不貪支俸給官薪。分定榮枯付往因。自信我爲當去客。
劇憐君是未歸人。一身只要貧長健。万事休憑夢當真。
別後有書煩屢寄。免教北望苦馳神。

立秋後三日匠門家集梨園爲勝會再邀余入

座四疊前韻

夜似長年日小年。逢場何忍獨醒然。野王岸上停三弄。
司馬江頭輟四絃。月裏霓裳聽乍徹。座中白髮感尤先。
梨園法曲皆供奉。或恐人間是別傳。

道山亭在福州城內宋程公闢爲守時所建曾

南豐爲作記者也。歲久傾圮。林子鹿原得其故址。將築堂名以辨香。蓋取陳后山向來一瓣香敬爲曾南豐之句。屬友人繪圖來索詩。

宋時道山亭。初自程太守南豐與作記。膾炙人在口。從此此亭名遂爲曾氏有。歷年經八百。頽廢來已久。鹿原嗜古人。尋碑攘榛藪。擘窠三大字。云出林希手。其字今倖存。其人無足取。大哉復古義。義取別賢否。築堂名辨香。欲以妍蔽醜。在昔陳與曾。同時實師友。子今生末世。獨立嘆無偶。私淑夫豈徒。行將奉箕箒。庸非學問力。即事期不朽。我昨遊三山。探奇意多負。銀袍者誰子。曾解讀碑否。

劉後村福州道山亭詩城中楚
楚銀袍子來讀曾碑有幾人

警露軒鶴雛爲鹿原賦

吾聞鶴之性與露最相警軒以警露名借鶴用自省今年果得鶴先後名寔併出殼曾幾時風標已閒靜仰窺俯有拾咫尺回素頸主人院落寬老樹蔭苔井雞群知獨立瘦骨挾仙影未得戛然鳴奈茲秋夜永翀天會有日羽翮在修整

題樓敬思夢洗三硯圖二首

曾於夢裏得三硯三館今來校秘書不信校書真應夢但拋心力注蟲魚
夢筆如江夢鳥羅微凹聚墨不爭多文章豈必關神授知有工夫在洗磨

次韵奉酬院長西厓前輩贈行之句

直從毛羽假翩翩

用南史蕭引傳中語

送我歸耕潁上田

比較鶴鸞宜落後簸揚糠粃愧居先東門古有迴車路西夕天留養拙年且喜歐陽爲學士蓬山領袖得詩仙

附原作

湯右曾

鶴鸞臺閣正聯翩忽賦歸與種秫田爲樂恐教兒輩覺生天一任丈人先元和體有三千首謝朓才論二百年我欲舉君還自代似君真合領群仙

第 35698 号

平成 3. 11. 22

聖和学
園短大
図書館

928

5

12

Faint vertical text in a grid, likely bleed-through from the reverse side of the page. The text is mostly illegible due to fading and the grid lines.

